

فيلسوف ولاد البلد

صلاح جاهين

حياته - رباعياته - أغانيه - أشعاره

عاطف عمارة

الحرية

للنشر والتوزيع

٢ ميدان عرابي وسط البلد - القاهرة

ت: ٢٦١٥٦٤٦ - ٥٧٤٥٦٧٩ م: ١٢٢٨٧٧٩٢١

اسم الكتاب	فيلسوف ولاد البلد - صلاح جاهين
تأليف	عاطف عمارة
الناشر	الحرية للنشر والتوزيع
	٣ ميدان عرابي وسط البلد - القاهرة
	ت: ٢٦١٥٦٤٦ - ٥٧٤٥٦٧٩
	م: ١٢٢٨٧٧٩٢١
رقم الإيداع	٢٥٧٧ / ٢٠٠٤
الترقيم الدولي	7 - 85 - 23 - 203

حقوق الطبع محفوظة للناشر

فيلسوف ولاد البلد

صلاح چاهين

صالح جاهين

- بدأ عمله الصحفي في ١٩٥٢، وتألقت أعماله الفنية في روزاليوسف واشترك في إصدار مجلة صباح الخير. ثم انضم للأهرام ١٩٦٤.
- ابتكر عدداً من شخصيات الكاريكاتير الشعبية وأثار برسومه معارك سياسية وفكرية كبيرة.
- من رواد الكتابة لمسرح العرائس
- كتب إستعراضات كثيرة للتلفزيون وسيناريو وحوار عديد من الأفلام.
- له عدة مؤلفات منها عن القمر والطيف، والرياحيات، الأغاني، الأزجال الصحفية.
- نال وسام الدولة للعلوم والفنون من الطبقة الأولى.
- توفي الشاعر الكبير في ٢١ إبريل ١٩٨٦م.

الرباعيات

ورث بيرم التونسي كل تقاليد الشعر الشعبي في مرحلة المختلفة وقام بعملية إحياء عميقة وتطوير موهوب لهذه التقاليد، وساعدته على ذلك موهبة غنية، فهو بحر لا ينتهي من الصور الشعبية والألفاظ الشعبية وقد ظل بيرم التونسي في ميدان الشعر الشعبي أميرا له لا يناقسه أحد طيلة هذه الفترة الطويلة التي تبدأ منذ مرحلة التمهيد لثورة ١٩١٩ إلى قيام ثورة ٢٣ يوليو ١٩٥٢م.

ومع مقدمات ثورة ٢٣ يوليو ظهر صلاح جاهين ليكون خطوة جديدة في تطور الشعر الشعبي وليحتل بموهبته الكبيرة المكان الذي أصبح خاليا بعد أن أعطانا أمير الشعر الشعبي أزوع ماعنده.

مع إن كل الخلق من أصل طين
وكلهم بينزلوا مَغْمَضِينَ
بعد الدقايق والشهور والسنين
تلاقى ناس أشرار وناس طيبين
عجبي!!

عجبي عليك.. عجبي عليك يا زمن
يا بو البدع يا مبكى عيني دماً
إزاي أنا أختار لروحي طريق
وانا اللي داخل في الحياة مرغماً
عجبي !!

مرغم عليك يا صُبح مفصوب بالليل
لادخلتها برجلٍ لا ولا كانلى ميل
شايلى شيل دخلت انا في الحياة
وبكره ح اخرج منها شايلى شيل
عجبي !!

سنوات وفايته علياً فوج بعد فوج
واحدة خدتني ابن والتانية زوج
والتالثة أب خدتني والرابعة إيه
إيه يعمل إللى بيخدقه موج لموج؟
عجبي !!

وانا في الضلام.. من غير شعاع يهتكه
أقف مكانى بخوف ولا أتركه
ولما بيحى النور وأشوف الدروب
أحتار زيادة.. أيهم أسلكه؟
عجبي!!

نظرت في الملكوت كثير وانشفلت
وبكل كلمة (ليه؟) و (عشانيه) سألت
اسأل سؤال.. الرد يرجع سؤال
واخرج وحيرتى أشد مما دخلت
عجبي!!

خرج ابن آدم م العدم قلت: ياه
رجع ابن آدم للعدم قلت: ياه
تراب بيحيا.. وحى بيصير تراب
الأصل هو الموت والا الحياة؟
عجبي!!

ضريح رخام فيه السعيد اندفن
وحفره فيها شريد من غير كفن
مریت عليهم.. قلت يا للعجب
لاتنين ريحتهم فيها نفس العفن
عجبي!!

ياما صادفت صحاب وما صَحِبْتَهُمْ
وكاسات خمور وشراب وما شَرِيتَهُمْ
أندم على الفرص اللى انا سَبِيتَهُمْ
والا على الفرص اللى ما سَبِيتَهُمْ
عجبي!!

والكون ده كيف موجود من غير حدود
وفيه عقارب ليه وتعايين ودود
عالم مجرب فات وقال سلامات
ده ياما فيه سؤالات من غير ردود
عجبي!!

غدر الزمان يا قلبي مالهوش أمان
وحاييحي يوم تحتاج لحبة إيمان
قلبي ارتجف وسألني.. أأمن بآيه؟
أأمن بآيه محترار بقالى زمان
عجبي !!

يا باب أيا مقفول.. إمتى الدخول
صبرت ياما واللى يصبر ينول
دقيت سنين.. والرد يرجع لى: مين؟
لو كنت عارف مين أنا.. كنت أقول
عجبي !!

سَهِير ليالى وياما لفيت وطففت
وف ليلة راجع فى الضلام قمت شفت
الخوف.. كأنه كلب سدّ الطريق
وكننت عاوز أقتله.. بس خُففت
عجبي !!

كان فيه زمان سحليّة طول فرسخين
كهفين عيونها وخشمتها بريخين
ماتت. لكن الرعب لم عمره مات
مع إنه فات بدل التاريخ تاريخين
عجبي !!

أنا شاب لكن عمري ولا ألف عام
وحيد ولكن بين ضلوعي زحام
خايف ولكن خوفي مني أنا
أخرس ولكن قلبي مليان كلام
عجبي !!

أحب اعيش ولو أعيش في الغابات
أصحي كما ولدتنى أمي وابات
طائر.. حُوان.. حشرة.. بشر.. بس اعيش
محلا الحياة.. حتى في هيئة نبات
عجبي !!

عجبتنى كلمة من كلام الورق
النور شَرَقَ من بين حروفها وبرَقَ
حبّيت أشيلها فى قلبى.. قالت حرام
ده انا كل قلب دخلت فيه اتحرَقَ
عجبنى !!

رقبة قزازة وقلبى فيها انحشر
شربت كاس واثنين وخامس عشر
صاحبت ناس م الخمرة ترجع وحوش
وصاحبت ناس م الخمرة ترجع بشر
عجبنى !!

كل اللى فى الخمّارة صابهم جنون
صبحوا الرجال يتبادلوا كاس المنون
وبَدَمَ ونَبِيت انكتب ع الجدار
«يا ميت ندامة ع اللى قلبه حنون»
عجبنى !!

قالوا الشقيق بيْمُصّ دم الشقيق
والناس ما هَيَّاش ناس بحق وحقيق
قلبي رميته وجبت غيره حجر
داب الحجر.. ورجعت قلبي رقيق
عجبي !!

يوم قلت آه.. سمعوني قالوا فَسَدَ
ده كان جدع قلبه حديد واتحسد
رديت على الاليمين أنا وقلت.. آه
لو تعرفوا معنى زئير الأسد
عجبي !!

بين موت وموت.. بين النيران والنيران
ع الحبل ماشيين الشجاع والجبان
عجبي عَلادى حياة.. ويا للعجب
إزاي أنا - ياتخين - بقيت بهلوان
عجبي !!

أنا قلبى كان شخشيخة أصبح جرس
جلجلت به صحبوا الخدم والحرس
أنا المهرج.. قمتوا ليه خفتوا ليه
لا فإيدى سيف ولا تحت منى فرس
عجبنى !!

دخل الربيع يضحك لقانى حزين
نده الربيع على إسمى لم قلت مين
حط الربيع أزهاره جنبى وراح
وايش تعمل الأزهار للميتين
عجبنى !!

مهبوش بخربوش الألم والضياع
قلبنى ومنزوع م الضلوع انتزع
يا مرايتى يا اللى بترسمى ضحكى
يا هلتـرى ده وش والأقناع
عجبنى !!

حبيت.. لكن حب من غير حنان
وصاحبت لكن صُحبه مالهاش أمان
رحت لحكيم واكثر لقيت بلوتي
إن اللي جوّه القلب مش ع اللسان
عجبي !!

ليه يا حبيبتي ما بيننا دايماً سفر
ده البعد ذنب كبير لا يُغتفر
ليه يا حبيبتي ما بيننا دايماً بحور
أعدى بحر الأقي غيره اتحفر
عجبي !!

ورا كل شباك ألف عين مفتوحين
وانا وانتى ماشيين يا غرامى الحزين
لو التصقنا نموت بضربة حجر
ولو افترقنا نموت متحسرين
عجبي !!

نوح راح لحاله والطوفان استمر
مركبنا تايهة لسه مش لاقية بر
آه م الطوفان وآهين يا بر الأمان
إزاي تبان والدنيا غرقانة شر
عجبي !!

على رجلى دم.. نظرت له ما احتملت
على إيدى دم.. سألت: ليه؟ لم وصلت
على كتفى دم وحتى على راسى دم
أنا كُلّى دم.. قتلت؟.. والا اتقتلت؟
عجبي !!

أنا كل يوم أسمع.. فلان عذّبوه
أسرح فى بغداد والجزاير واتوه
ما اعجبش م اللى يطيق بجسمه العذاب
واعجب من اللى يطيق يعذب أخوه
عجبي !!

ينبوع وفي الحواديث أنا سمعت عنه
إنه عجيب.. وف وسط لهاليب لكنه
شقيت كما الفرسان طريقى.. لقيت
حتى الخنازير والكلاب شربوا منه
عجبي !!

ملاحج ومراحل التكوين صلاح جاهين من هو...؟

من الأهمية بمكان كبير أن نعرف شيئاً عن البيئة التي ولد فيها صلاح جاهين... وإذا كانت البيئة الأولى ولد فيها صلاح جاهين... وإذا كانت البيئة الأولى لا أهمية لها بالنسبة لبعض الفنانين فهي بالنسبة للبعض الآخر تلعب دوراً آخر على جانب كبير من الأهمية ومن بين هؤلاء صلاح جاهين.

ولد صلاح جاهين سنة ١٩٢٠ فى بيت كان بطله وفارسه الأول واحداً من تلاميذ مصطفى كامل وزملائه فى الثورة، ذلك هو أحمد حلمى، رئيس تحرير جريدة اللواء، وحَدَّ صلاح جاهين.. ومصطفى كامل كان يقود ثورة من نوع خاص، فقد كانت روح مصر قد أصابها اليأس بعد إنهيار الثورة العربية وفشلها، وكان مصطفى كامل هو أول إبتسامة وسط هذا الضباب وأول شعاع من الأمل وكان أحمد حلمى من أكثر المتحمسين لمصطفى كامل، وللروح الجديدة التى يمثلها وقضى هذا الرجل حياته فى صراع ضد الإستعمار عن طريق عمله فى الصحف، ثم سجنه الإنجليز متهماً بالوطنية والدعوة إلى الثورة عليهم، وكان كاتباً وشاعراً وقد كان شعوره الوطنى يلون كل شيء حتى حياته اليومية، فكان إذا رأى أحداً يضرب طفلاً فإنه يقول «إتركوه ربما كان هذا هو الذى سيخرج الإنجليز من مصر»

كان أحمد حلمى إمتدادا لجناح المثقفين فى ثورة عرابى، وكان مثل بقية الحزب الوطنى فى عهد مصطفى كامل ومحمد فريد، من أبناء الجيل الثانى لهذا الجناح.

وقد عاش صلاح جاهين طفولته الأولى فى هذا الجو. وترتبت فيه «هذه الحاسة الشعبية». منذ طفولته الأولى من خلال الأحاديث والأحداث والأشخاص الذين كانوا يحيطون بجده، ويكونون الجو الرئيسى للأسرة كلها.

يا قرص شمس ما لهش قبة سما
يا ورد من غيير أرض شب ونما
يا أى معنى جميل سمعنا عليه
الخلق ليه عايشين حياه مؤلمة
عجبنى !!

شاف الطبيب جرحى وصَف له الأمل
وعطانى منه مقام يا دوب ما اندمل
مجروح جديد يا طبيب وجرحى لهيب
ودواك فرغ منى . . وإيه العمل ؟
عجبنى !!

أعرف عيون هي الجمال والحسن
وأعرف عيون تأخذ القلوب بالحسن
وعيون مخيفة وقاسية وعيون كثير
وياحسّ فيهم كلهم بالحزن
عجبي !!

إيش تطلبى يا نفسى فوق كلّ ده
حظك بيضحك وانتى متنكدة
ردت قالت لى النفس : قول للبشر
ما بيصوليش بعيون حزينه كده
عجبي !!

إقلع غمماك يا تور وارفض تلفّ
إكسر تروس الساقية واشتم وتّف
قال: بس خطوة كمان . . وخطوة كمان . .
يا اوصل نهاية السكة يا البير يجف
عجبي !!

يا حزين يا قمقم تحت بحر الضياع
حزين أنا زيك وإيه مستطاع
الحزن ما بقالهوش جلال يا جدع
الحزن زى البرد . . زى الصداع
عجبي !!

. . فى يوم صحيت شاعر براحة وصفاء
الهم زال والحزن راح واختفى
خَدْنِي العجب وسألت روحى واختفى سؤال
أنا مُت ؟ . . والا وصلت للفلسفة ؟
عجبي !!

الفيلسوف قاعد يفكر سيَبُوهِ
لا تعملوه سلطان ولا تصلبوه
ما تعرفوش إن الفلاسفة يا هوه
اللى يقولوه بيرجعوا يكذبوه ؟
عجبي !!

على بعد مليون ميل من أرضنا
من الفراغ الكوني بصيت أنا
لا شفت فرق ما بين جبال أو بحور
ولا شفت فرق ما بين عذاب أو هنا
عجبي !!

إنسان أيا إنسان ما أجهلك
ما أتفهلك في الكون وما أضالك
شمس وقمر وسدوم وملايين نجوم
وفاكرها يا موهوم مخلوقة لك ؟
عجبي !!

نظرت فوقى للنجوم وأنا ساير
رجليا عثرت في الحُفَر والحجاير
بقيت أقول وأنا ع التراب: يا سلام
مش بس عبره أخذت لكن عباير
عجبي !!

- يا نجم . . نورك ليه كده بيرتجف؟
هو انت قنديل زيت؟ . . أو تختلف؟
- أنا نجم عالى . . بس عالى قوى
وكل ما انظر تحت اخاف انحدف
عجيبى !!

السم لو كان فى الدوا . . منين يضر؟
والموت . . ولو لعدوتنا . . منين يُسر؟
حُط القلم فى الحبر واكتب كمان
. . والعبد للشهوات . . منين هو حُر؟
عجيبى !!

وقفت بين شطين على قنطرة
الكذب فين والصدق فين يا ترى
محتارح اموت . . الحوت خرج لى وقال
هو الكلام يتقاس بالمسطرة؟
عجيبى !!

سرداب فى مستشفى الولاده طويل
صرخات عذاب ورا كل باب وعويل
. . وفى الطريق متزوقين البنات
متزوقين للحب والمواويل
عجبنى !!

الدنيا أوده كبيره للانتظار
فيها ابن آدم زيئيه زى الحمار
الهم واحد. والمَلَلْ مشترك
ومفيش حمار بيحاول الإنتحار
عجبنى !!

أيوب رمى البين بكل العِلل
سبع سنين مرضان وعنده شلل
الصبر طيب . . صبر أيوب شفاه
بس الأكاده مات بفعل المَلَلْ
عجبنى !!

نسممة ربيع لكن بتكوى الوشوش
طيور جميلة بس من غير عشوش
قلوب بتخفق .. إنها وحدها
هى الحياه كده .. كلها فى الفاشوش
عجيبى !!

يا طير يا عالى فى السما طُظ فيك
ما تفتكرشى ربنا مُصطَفِيك
برضك بتاكل دود وللطين تعمود
تمص فيه يا حلو .. ويمص فيك
عجيبى !!

كروان جريح مضروب شمع م القمر
سقط من السموات فؤاده انكسر
جريت عليه قطه عشان تبلعه
أتاريه خيال شعراء ومالهوش أثر
عجيبى !!

ياللى نصحت الناس بشرب النبيث
مع بنت حلوه . . وعود ، وضحك ، وحديث
مش كنت تنصحه منين يكسبوا
تَمَن ده كله ؟ . . والا يمكن نسييت
عجبي !!

ما حد فى الدنيا دى واخذ جزاته
ولا حد بي فكر فى غير لذاته
ما تعرفيش يا حبيبتي . . أنا وانتى مين ؟
إنتى عروس النيل . . وأنا النيل بذاته
عجبي !!

رقاصه خرسا ورقصه من غير نغم
دنيا . . يا مين يصالحها قبل الندم
ساعَتِن تهز بوجهها يعنى لا
يترجرجوا نهديها يعنى نعم
عجبي !!

إخطفنى ياللى تحببني ع الحصان
الدنيا قالت يوم في ماضى الزمان
إخطفنى ياللى تحببني ع الفرس
الدنيا قالت .. قام خطفها الشيطان
عجبي !!

من بين شقوق الشيش وشقشقت لك
مع شهقة العصافير وزقزقت لك
نهار جديد انا .. قوم نشوف نعمليه
انا قلت يا ح تقتلني .. يا ح اقتلك
عجبي !!

قلبي عليل يا ناس وفي الكاس دواه
مديت له إيدي شريت م اللى حواه
جنبي الشمال خف .. اليمين اتوجع
وايه يداوى الكببد م اللى كواه
عجبي !!

دى مذكرات وكتبتها من سنين
فى نوته زرقا لون بحور الحنين
عترت فيها . . رميتها فى المهملات
وقلت أما صحيح كلام مخبولين
عجبنى !!

دخل الشتاء وقفل البيبان ع البيوت
وجعل شعاع الشمس خيط عنكبوت
وحاجات كتير بتموت فى ليل الشتاء
لكن حاجات أكثر بترفض تموت
عجبنى !!

- الدنيا من غير الربيع ميّته
ورقة شجر ضعفانه ومفتفته
- لا يا جدع غلطان تأمل وشوف
زهر الشتاء طالع فى عز الشتاء
عجبنى !!

ياللى انت بيتك قش مفروش بريش
تقوى عليه الريح . يصبح مفيش
عجبنى عليك حواليك مخالب كبار
وما لكش غير منقار وقادر تعيش
عجبنى !!

سمعت نقطة مائه جوه المحيط
بتقول لنقطه ماتنزلش فى الغويط
أخاف عليكى م الفرق . . قلت انا
ده اللى يخاف م الوعد يبقى عبيط
عجبنى !!

جالك أوان ووقفت موقف وجود
يا تجود بده يا قلبى يا بده تجود
ما حد يقدر يبقى على كل شىء
مع إن - عجبنى - كل شىء موجود
عجبنى !!

مرحلة الشباب

عاش صلاح جاهين مرحلة أخرى غير مرحلة الطفولة، كان لها تأثير عميق على شخصية صلاح جاهين، فقد عاش مع والده الذي كان قاضياً في بعض القضايا المعروفة في تاريخ الفلاحين مثل قضية «بهوت» التي كانت قائمة على أساس الصراع بين الفلاحين وبعض الإقطاعيين، حيث حاول الإقطاعيون أن يستغلوا سلطانهم ضد الفلاحين وأن يرغموا القانون على أن يكون في خدمتهم، وكان ذلك سنة ١٩٥١ حيث كان صلاح جاهين في مطلع شبابه، وبداية وعيه الفني، وقد أثرت قضية «بهوت» على نفسه، وانطبعت بعمق في وجدانه، وكانت هذه القضية وضعت حداً لتردد موهبته الفنية في البحث عن طريق، فاختر صلاح جاهين من يومها لموهبته أن تجد مادتها الفنية في حياة الشعب ومشاعره.

جالك أوان وعرفت مشى الجنائز

كيف شُفّتها يا عبد رب اللدايز

قال : شفت شيل بالحيل فقير أو أمير

كما شالوا في الخمامير فواضى القزايز

عجبي !!

إنّا كنت شيء وصبحت شيء ثم شيء
شوف رينا . . قادر على كل شيء
هزّ الشجر شواشييه ووشوشنى قال :
لابد ما يموت شيء عشان يحيا شيء
عجبنى !!

يا مشرط الجراح أمانة عليك
وانت فُ حشايا تبص من حواليك
فيه نقطة سوده فى قلبى بدأت تبان
شيها كمان . . والفضل يرجع إليك
عجبنى !!

كيف شفت قلبى والنبي يا طبيب
همد ومات والا سامع له دبيب
قاللى لقيته مختنق بالدموع
وما لوش دوا غير لسه من إيد حبيب
عجبنى !!

تسلم يا غصن الخوخ يا عود الحطب
ييجى الربيع . . تطلع زهورك عجب
وانا ليه بيمضى ربيع وييجى ربيع
ولسه برضك قلبى حنة خشب
عجبنى !!

بحر الحياه مليان بفرقى الحياه
مَرَحَتْ خَش الموج فى حلقى ملاء
قارب نجاه . . مَرَحَتْ قالوا مفيش
غير بس هو الحُب قارب نجاه
عجبنى !!

فارس وحيد جوّه الدروع الحديد
رفرف عليه عصفور وقال له نشيد
منين منين . . ولفين ولفين يا جدع
قال من بعيد ولسه رايع بعيد
عجبنى !!

كان فيه قمر كأنه فرخ الحمام
على صغره دق شعاع شق الغمام
أنا كنت حاضرك له ينصرك
إشحال لما ح تبقى بدر التمام
عجبي !!

النهد زى الفهد نط اندلع
قلبي انهيش بين الضلوع وانخلع
ياللى نهيت البنت عن فعلها
قول للطبيعة كمان تبطل دلح
عجبي !!

صوتك يا بنت الإيه كأنه بدن
يزيق يزيح الهم يمحي الشجن
يا حلوتي وبدنك كأنه كلام
كلام فلاسفة سكروا نسيوا الزمن
عجبي !!

كـريـاج سـمـاده وقلـبـى مـنـه انـجـلد
رَمَحَ كَأَنَّهُ حَصَّانٌ وَلَفَّ الْبِلْدَ
وَرَجَعَ لِي نَصُّ اللَّيْلِ وَسَأَلَنِي . . لِيَه
خَجَلانَ تَقُولُ أَنْكَ سَمِيدٌ يَا وَلَدَ
عجـبـى !!

مَزَيَّكَ هَادِيَهُ الْكُونِ فِيهَا أَنْغَمَرُ
وَصَيْفٌ وَلَيْلٌ وَعُقْدٌ فَلَّ وَسَمَرُ
يَا هَلْتَرَى النَّاسَ كُلَّهُمْ مَبْسُطَوِينَ
وَيَا هَلْتَرَى شَايِفِينَ جَمَالَ الْقَمَرِ ؟
عجـبـى !!

إِنْشَدَ يَا قَلْبِي غَنَوْتَكَ لِلْجَمَالِ
وَارْقَصَ فِي صَدْرِي مِنَ الْيَمِينِ لِلشَّمَالِ
مَا هَوْشَ بَعِيدٍ تَفْضِلُ لِبُكَرِهِ سَمِيدَ
دَهْ كُلِّ يَوْمٍ فِيهِ أَلْفُ أَلْفِ احْتِمَالِ
عجـبـى !!

آه لو أنا ومحبوبى جُزنا الفضا
فى سفينة وحدينا . . وأشيا رضا
ساعة صفا تعجبنا نرجع لها
والهم قبل ما ييجى . . . يبقى مضى
عجبنى !!

أنا إله الوجود رب الهيام
أضرب بسهم الوهم وهَم الغرام
وهَم الغرام من كتر ما هُو لذيذ
رَشَقْتُ انا ف صدرى جميع السهام
عجبنى !!

حدوته عن جمران وعن خُنفسه
اتقابلوا حَبَّوا بعض ساعة مِسَا
ولا قال لهم حد اختشوا عيب حرام
ولا حد قال دى علاقة متدنسة
عجبنى !!

يا للى عـرـفـت الحـب يـومـ و انـطـوى
حـسـك تـقـول مـشـتـاق لـنـبـع الـهـوى
حـسـك تـقـول مـشـتـاق لـنـبـع الـغـرام
دـه الحـب . . مـين دـاق مـنـه قـطـره . . ارـتـوى
عـجـبـى !!

زحـام و أبـواق سـيـارات مـزـعـجـة
إلـى يـطـول لـه رـصـيـف . . يـبـقـى نـجـا
لو كـمـت جـنـبـى يا حـبـيـبـى أنا
مـش كـنت اـشـوف إـن الحـيـاة مُـبـهـجـة ؟
عـجـبـى !!

إيـدـيـا فـى جـيـوى و قـلـبـى طـرـب
سـارح فـى غـرـيـة بـس مـش مـِغـتـرـب
و حـدى لـكـين و نـسـان و مـاشـى كـدـه
و بـا بـتـعـد . . . ما اعـرـفـش . . . أو باقـتـرـب
عـجـبـى !!

يا ميت ندامه ع القلوب الخلا
لا محبة فيها ولا كراهه ولا
حتى يا قلبى الحزن ما عادش فيك
معلش . . . لك يوم برضه راح تتملا
عجبي !!

مرحب ربيع مرحب ربيع مرحبة
يا طفل يا للى ف دمي ناغا وحبًا
علشان عيونك يا صُفْنَن هويت
حتى ديدان الأرض والأغـريه
عجبي !!

فتحت شباكى لشمس الصباح
ما دخلش منه غير عويل الرياح
وفتحت قلبى عشان أبوح بالألم
ما خرجش منه غير محبه وسماح
عجبي !!

غمست سنك فى السواد يا قلم
علشان ما تكتب شعر يقطر ألم
مالك جراك إيه يا مجنون . . . وليه
رسمت وردة وبيت وقلب وعلم
عجى !!

انا الذى عمري اشتياق فى اشتياق
وقطر داخل فى محطة فراق
قصدت نبع السم وشربت سم
من كتر شوقى وعشمتى فى الترياق
عجى !!

انا الذى عشت الزمن مضىعة
بروح حزينة معفنة مضعضعه
زرعت شجرة سنط لجل انجرح
لقيتها شعر البنت ومفرعة
عجى !!

لو فيه سلام فى الأرض وطمان وأمن
لو كان مفيش ولا فقر ولا خوف وجبن
لو يملك الانسان مصير كل شىء
انا كنت أجيب للدنيا ميت ألف ابن
عجبنى !!

العُشب طاطا للنساييم ونخ
أخضر طرى مالهش فى الحُسن أخ
عصفور عبيط أنا . . غاوى بهجة وغنا
ح انزل هنا . . وانشا لله يهبرنى فخ
عجبنى !!

أوصيك يا ابنى بالقمر والزهور
أوصيك بليل القاهرة المسحور
وإن جيت فى بالك . . إشتري عُقد قُل
لأى سمرا . . . وقبرى إوعك تزور
عجبنى !!

غمض عينيك وارقص بخفة ودلع
الدنيا هي الشابة وانت الجذع
تشوف رشاقة خطوتك تعبدك
لكن انت لو بصيت لرجليك . . تقع
عجبي !!

حاسب من الأحزان وحاسب لها
حاسب على رقابيك من قبلها
راح تنتهي ولا بد راح تنتهي
مش انتهت أحزان من قبلها ؟
عجبي !!

يأسك وصبرك بين إيديك وانت حر
تيأس ما تيأس الحياه راح تمر
أنا دقت مندا ومندا عجبي لقيت
الصبر ممر وبرضك اليأس ممر
عجبي !!

ولدى نصحتك لما صوتى اتنبّح
ما تخافش من جنّي ولا من شَبَح
وان هبّ فيك عفریت قتيل إسألّه
ما دافعش ليه عن نفسه يوم ما اندبح ؟
عجبي !!

الشعر الشعبي

من تقاليد الشعر الشعبي الإيمان العميق بالجمال الملموس والميل إلى تحويل «الموضوعات» إلى أشياء معشوقة، يتحدث عنها الفنان الشعبي كما يتحدث عن حبيبته التي تعيش في قلبه، ولا شك أن الفنان الشعبي صادق الإحساس في هذه النزعة، فالحب هو أرقى العواطف البشرية وهو أغنى منابع الفن، ولقد أصبح القمر في وجدان الإنسانية كلها شيئاً جميلاً، لأن الفنان منذ القدم كان يشبه وجه المحبوبة بالقمر، أي أنه كان يعطى للقمر صفة إنسانية، عاطفية.. ولذلك فالقمر في وجداننا دائماً هو مثال للرقّة والجمال والعذوبة.

من هذا المثل البسيط نستطيع أن ندرك عمق الشاعر الشعبي، وصدق فطرته، عندما كان يضيف على الطبيعة وعلى كل الأشياء المحبوبة، صفات «العشق» و «العاطفة» وهو يضيف هذه الصفات على الحبيبة وعلى الصديق، وعلى الزعيم أو البطل.. فشخصية «النبي» وهو بطل من أبطال الشعر الشعبي، لا يستطيع الشاعر أن يتصورها بدون أن تكون في عينيه مثلاً أعلى للجمال والوسامة.. فالنبي حلو، وجميل، تفيض صفاته المعنوية على حواسه، فيصبح وجهه مضيئاً وعينه ساحرتين كأنهما عينا شخص محبوب معشوق.. وعندما تعود إلى الموال المشهور عن الأدهم البطل الشعبي تجد أن هذا البطل كما يصوره الموال كان وسيماً حلواً، كأنه فتاة عذراء فاتنة، والشاعر الشعبي عاشق يتغزل فيه أرق الغزل وأجمله هذه النظرة العاطفية العاشقة عند الشاعر الشعبي لا

تتخلّى عنه حتى فى أغاني الموت ففى إحدى «البكائيات» التى يرثى بها للشاعر فتاة، تتحول القصيدة إلى غزل حسى عجيب يقول الشاعر فى هذه القصيدة «الأدب الشعبى - رشدى صالح ص ٢٥٢»

يامُّ الجطيفة، جطفيتك حمرة
تحلى الجطيفة فى ليلة الدخلة
يامُّ الجطيفة جطفيتك زيتى
تحلى الجطيفة لما تيجى بيتى
يامُّ الجطيفة جطفيتك وردى
خلى الجطيفة لما تيجى عندى

فالقصيد رغم نغمها الحزين وجوها الحزين تكاد تصبح قصيدة غزلية تتفنن بجمال الحبيبة وحسنها.

وصلاح جاهين، يمتلك هذه الحاسة الشعبية العميقة، إنه مثل الشاعر الشعبى القديم، ينظر إلى موضوعاته نظرة العاشق إلى حبيبته، وبذلك تكون هذه الموضوعات قريبة إلى نفس الشاعر قريبة إلى نفس القارئ وتصبح صفاتها الإنسانية الجميلة مادة فنية خصبة.

ولدى إليك بدل البالون ميت بالون
انفخ وطرقع فـيـه على كل لون
عساك تشوف بعنيك مصير الرجال
المنفوخين فى السترة والبنطلون
عجـبـى !!

خُوض معركتها زى جدك ما خاض
صالب وقالب شفتك بامتعاـض
هـى كـده . . ما تنولش منها الأمل
غير بعد صدّ وِرْدٍ ووَجاع مخاض
عجـبـى !!

كام اشتغلت يا نيل فى نحت الصخور
مليون بئـونه وألف مليون هاتور
يا نيل أنا ابن حلال ومن خـلفـتـك
وليه صـعـيبـه على بس الأمور
عجـبـى !!

منين أجيبها كلمه متأله
لعيبة فايهر حايره ومصممة
منين أجيب كلمة تكون بنت أرض
تشقى اللى ما شفاهوش كلام السما
عجبي !!

أنا قلت كلمة وكان لها معنيين
كما بطن واحد وتوأمين زين وشين
لو دنيا شر . . التوأم الخير يموت
لو دنيا خير . . الشر ح يعيش منين ؟
عجبي !!

أنا اللى بالأمر المحال اغتوى
شفت القمر نطيت لفوق فى الهوا
طلته ما طلتوش إيه أنا يهمنى
وليه . . . ما دام بالنشوة قلبى ارتوى
عجبي !!

برّه القزاز كان غيم وأمطار وبرق
ما يهمنيش - انا قلت - ولا عندي فرق
غيّرت رأيي بعد ساعة زمان
وكنت في الشارع . . . وفي الجزمة خرق
عجبي !!

عيني رأت مولود على كتف أمه
يصرخ تهنّ فيه يصرخ تضمّه
يصرخ تقول يا بني ما تنطق كلام
ده اللي ما يتكلمش يا كترهمّه
عجبي !!

يا عندليب ماتخافش من غنوتك
قول شكوتك واحكى على بلوتك
الفنوه مش ح تموتك إنما
كتم الغنا هو اللي ح يموتك
عجبي !!

يا للى بتبـحث عن إله تعبده
بحث الفـريق عن أى شىء ينجده
الله جميل وعليم ورحمن رحيم
إحمل صفاته . . . وانت راح توجده
عجـبى !!

حقرا وفوق كوكب حقير محتقر
فى الكون تكون دنياكو إيه يا بـقـر
رملايه من صحرا . . ؟ لكن إيش تقول
والكون بحاله جوّه عقل البشر
عجـبى !!

لا تجبر الإنسان ولا تخيـره
يكفيه ما فيه من عقل بيحيـره
الى النهارده بيطلبه ويشتهيـه
هو اللى بكره ح يشتهي يغيـره
عجـبى !!

طال انتظاري للربيع يرجع
والجويدفنا والزهور تطلع
عاد الربيع عارم عرمرم شباب
إيه اللي خالني ابتديت افزع ؟
عجبي !!

ولو انضنيت وفنيت وعمري انفرط
مش عاوز الجأ للحلول الوسط
وكمان شطط وجنون مانيش عاوز
يا مين يقول لي الصح فين والغلط ؟
عجبي !!

عاد الربيع كأنه طعم الحب
والحب نار جوه المروق بتصب
اتمتع ازاي بييه وانا متقطع
من كتر خوفي لا في الخطيئة يطب ؟
عجبي !!

ازای شبا بنا یقوم ویاخذ دوره
من غیر صراخ یئذیه و یجرح زوره
یا هلتری أحسن له یقعد ساکت
أو ینتړك ولو څرغ عن طوره ؟
عجبی !!

عینی رأت عصفور وویاه ابنه
بیحدفه فی الريح ویاخذه ف حضنه
نویتین وتالت نوبة - عجبی علیهم -
كانوا سوا بیرفرفروا ویغنوا
عجبی !!

أحسن ما فیها العشق والمعشقة
وشویتین الضحك والتریقة
شفت الحیاة ، لفیت ، لقیة الألد
تغییرها ، وده یعنی التعب والشقا
عجبی !!

عجبي على العجب العجيب العجائب
لما الحقيقة تطل بعد احتجاب
وتروق وتحلا وفجأة تصبح مفيش
كمثل طراطيش بحر ياما خد وجاب
عجبي !!

في الهوّ ماشى يا بهلوان إيش
يا فراشة منقوشة على كل وش
شقلبت عقلى وعقلى شقلبنى
وكننت باحسبني بقيت ما اندهش
عجبي !!

وقفت ساعة الصبح باغسل سناني
قالت لى شايف قوتى ولمعاني ؟
إيش تطلب اليوم منى ضحكة أسد ؟
والا ابتسامة اعلانات أمريكاني ؟
عجبي !!

الحلو يـمّ اليـمّ صـابـح رايـح
سارح في حـضن الميـه سـابـح سايـح
الحلو داب في البـحـر . قلت أدوقـه
وجدت لسه البـحـر بـرضـك مـالـح
عجبي !!

يا كل كلمة للعجب في قاموس
انسكلوبيديا لسان عرب أو لاروس
تعالوا نجدة . ده لسه في عصرنا
الشمس والبحر العريض بالفلوس
عجبي !!

الموج تلول تهـبـط وتـطـلـع تلول
يا بحر خدني الشط صاحبك ملول
والا بلاش الشط حـاـمـل به ايه
ده ريحته طحلب مهري وام الخلول
عجبي !!

عينى رأت مخلوق فى غاية البشاعة
أنا قلت له لما تأملتته ساعة:
اللذة والموت علموك اللّـزج
وأنا علمونى الفلسفة والشجاعة
عجبنى !!

غطس وقب الموج نهود بمبى
من ألف جيل جمالات ماتعلم بى
يا قلبى عيب دول أمهاتنا القدام
استغفر الله العظيم ربي
عجبنى !!

عَلّقت فى المسمار قناع مهزلة
ومعاه قناع مأساة بحزنه ابتلا
بصيت لقيتهم يشبهوا بعضهم
واهو ده العجب يا ولاد . وإلا فلا
عجبنى !!

المدينة والشاعر

المدينة بالنسبة للفنان الحديث تشبه الطبيعة بالنسبة للفنان القديم، فالفنان اليوناني مثلاً كان يبنى أدبه على صراع الإنسان مع الطبيعة.. لم يكن العلم قد تقدم فكان المطر والرعد والبرق والسحاب والعواصف، والأنهار والبحار، كانت كل هذه الأشياء تُرهب الإنسان وتُخيفه، وتشعره بأن هناك قوة مجهولة تسيطر على العالم، ولذلك نشأت الأساطير اليونانية، وكانت كلها تتبع من خوف الإنسان وصراعه ضد الطبيعة، ويظهر أن الإنسان قد حكم عليه، بالخوف الدائم والقلق، مهما تغيرت الأسباب واختلفت الدوافع على مر العصور.. والواقع أن الأسباب تتغير وتبقى النتيجة كما هي، فالإنسان دائماً يقف أمام قوة أكبر منه، يحاول أن يسيطر عليها ويُخضعها له. فلا يستطيع، ويظل يُصارع ويُصارع دفاعاً عن نفسه، وهذا الصراع هو دائماً نبع أصيل للمشاعر الكبيرة التي يعتمد عليها الفن.

إن المدينة العصرية تهز شعور الفرد بذاته، وتكاد تجعل منه نسخة طبق الأصل من الآخرين، ليتصرف ويعيش ويتحدث مثلهم.. والفنان الأصيل لا يمكن أن يكون تقليداً للآخرين، ولذلك فهو يقاوم تلك العوامل التي تحاول أن تهدمه أو تشكله حسب صورة معينة، والأضواء، والألوان الصاخبة لا تُغنى الفنان عن تحقيق ذاته، إن هذه الأشياء لا تعدو أن تكون كما قال فنان أوروبي عندما رأى مدينة أوروبية كبيرة.. «هذه زينة مفعجة».

وهذا التحليل ينطبق على صلاح جاهين.. إن أدواته الفنية هي الشعر الشعبي، ولكن بعض قصائده لا تفترق أبداً، في الأحاسيس والمشاعر عن الشعر العصري الذي يصور أزمة الإنسان في الحضارة الحديثة، حضارة التعقيد... حضارة المدنية.

في هذا النوع من القصائد يظهر حزن عميق يعبر عنه صلاح جاهين تعبيراً فنياً رقيقاً شديد الحساسية ومن أمثلة هذه القصائد «ولد و بنت» «شوقي قد إيه» - «بكائية» - «ميلاد» وكلها من ديوانه «عن القمر والطين» و«أشعار العامية المصرية»

والقصائد التالية من كتابه «أشعار العامية المصرية» وهي من أنضج تجاربه الشعرية إن لم تكن أنضجها على الإطلاق.

زى الفلاحين

القـمـح مش زى الذهب
القـمـح زى الفـلاحين
عيدان نحيلة جدرها بياكل فى طين
زى اسـمـمـمـمـمـم
ومـm

أما اللى فى القصر الكبير
يلبس حـرير
والسنبله
يبعت رجاله يصدوها من على
عود الفقىر

بحرى

آخر النهار هففت نسمة على الميّه
بعودا ليام على الجدعان وعليّا
يا صيادين القاروص صيد القاروص غيّه
رمى الشبك ع السمك يلزم له خفيّه

طرحت طرحه لقيت فى الطرحه جنيّه
حلّت شعورها وعقدتهم على عينيا
ونزلتتى القرار صرخ الشبار فيا
إرمى الشبك ع السمك ياواد بحنيّه

لادق ع الباب واقول للحلو يا جارى
رمى الشبك صنعتى والصبردا كارى

أصبر على الرزق لما تمتلى بحارى
وأصبر على العشق لما تنطفئ نارى

يا ميت ندامه على اللى البحر ما ادّاله
مفتوح عليه الحنك والكف ما دّاله
عدّى الشطوط والخطوط اللنش عدى له
غفر السواحل يا صاحبي مستعداله

أنا مذهبي الصبر واصبر حتى على تارى
واطعم شباكى وصنارى بصبارى
أنا اعوم على الصبر لما اوصل لأوطارى
والصبر دا مركبى والقلع والصارى

بكرة أجمل من النهارده

حبلت النسوان تسع تشهر طوال
راحت الأيام وجت كبروا العيال
اصبحوا الصبيان رجال
والبنات طلعت على صدورهم بزاز
واسـتـحق لهم جـواز
نسجوا توب الفرح من نور عينيهم
غـرـزوا فـيـه الغُـرز
غـرـزوا الأزهار في ديل الفسـاتين
بـســــــــــــــــــــــاتين
رفـعوا الصـبـيان إيديهم
بالشـاكـوش والمسطرين
عملوا البيت والجهاز

رفعوا الفاس والكوريك فى الفلاحين
جهزوا الصندوق ورجعوا بالطحين
واشتتروا حلقان خرز
والزمن فـات . . . فـات سنين
تـحـبـل النـسـوان وتولد
مـلـايـن
والغـيـطـان
ترمى غله وفول تلؤل فى كل رمية
ترمى توم وخيار وباميه
والشجر يطرح جوافه وبرتقان
والعنب تحت الورق لاخضر يعنقد
والبلح فوق النخيل يظهر ويعقد
لما تبقى الشمس حاميه
والزمن فـات . . فـات سنين
السـنـه تـسـبـح سـنـه
لما حـمـلـنى أنا
ونا قاعد على كرسى خـرزان
على قـهـوه فى المـيـدان

وبافكر فى الحياه من حواليا
والزمن واقف شــــــــــــــــويه
جنب ســــــــــــــــاعة البلدية
والعيال واقفين كمان
زى ما هم فى الميدان ما بيكبروش
والبنات قاعدين وما بيجوزوش
والفيطان هناك بعيد تحت السما
تحت عين الشمس راقده مسهمه
ونا قاعد وبافكر فى مشاكل
والزباين كلهم فى القهوه شكلى
كلهم بيــــــــــــــــفكروا
والعيال واقفين ولا بيكبروش
إنما بيــــــــــــــــهزروا
قبل ما يسير الزمن ويكبروا
والزمن عايز يســــــــــــــــير
ونا عايزه ينتظر وباصبره
لما اقول له شىء كــــــــــــــــتير

يا زمن آه يا زمــــــــــــــــان
يا لى طابع رسم كفك ع الحيطان
خمسه وخميسه فى عين ألـعن شيطان
أنا شفتك وانت ماشى فى الفيطان
خطاويك هيا السنابل ع العيدان
خطاويك فوق الدرّه هى الكيزان
هيا صوت الفاس بيفتح فى الحيطان
هيا لون القطن لابيض زى قلب الفلاحين
خطاويك الفــــــــــــــــيــــــــضــــــــان

أنا شفتك وانت خارج م البيبان
فى الصباح ويا العيال والشغالين
وانت ماشى ع الرصيف
خطاويك صوت القــــــــــــــــروش
فى الكــــــــــــــــفــــــــــــــــوف
فى خيال الشــــــــــــــــقيــــــــــــــــانين
والعرق فاحت ترع فوق الوشوش
والعيال رايحه المدارس

[illegible]

مشـيـوا ويا الناس فى عيد
ونا وياهم باغنى الأناشـيد
واحنـا شـايـلـين الرايات
طايره ويا النسـمه ويا الأغـنيات
على دقـات الطـبـول
واحنـا ماشـيين فى المـظـاهره
بنت مالت ناحيتى وأدتنى ورده
ورده حـمـمـه
قمت م القهوه سـعيد
وباقـول
بكره أجـمـل م النـهـارده

شوفی قد ایه

يا بخت من يقدر يقول
واللى ف ضمه يطرعه
يا بخت من يقدر يفضفض بالكلام
وكل واحد يس معه
يقف فى وسط الناس ويصرخ : آه يا ناس
ولا ملام
ييجى الطبيب يحكى له ع اللى بيوجعه
يكشف مكان الجرح ويحط الدوا
ولو وانك
يقدر ينوح
وانا اللى مليان بالجروح

ما اقدرش اقول
ما اقدرش ابوح
والسهم يسكن صدرى ما اقدرش انزعه
شوفى قعد إيه ؟

أحنا النهـارده إيه فى أيام السنة
شـتـا والأـ صـيف
وفـين أنـنا
إيه اللى وصّـلـنى هـنا
أنا صاحب البيت والأـ ضيف
صـوتى انـجـيس
ما اقدرش اقول
ما اعرفش حاجه علشان اقول
ما اعرفش غيرك انتى بس
يا بت ياللى فى حبك العقل اتهوس
مكان غـريب
كأنه سجن كأنه مخدع لحبيب
كأنه بيـر

شباك حديد وعليه ستاير من حرير
والريح بينفد منه زى المسامير

الريح عــوى
قــبى اتــــــــــــــــــــــــوى
الشمس تلج اصفر شعاعها صاروخ هوا
الظلمة تلج اسود كتيــــــــــــــــر
ألوف ألوف القناطــــــــــــــــير
خبينى فى شعورك يا بت
أحسن عروقى اتخششــــــــــــــــبت
شعرك خشن زى الحرام الصوف يابت
خبينى فيه م الزمهرير . .
ونــمىنى فى الســــــــــــــــرير
دخل النبى بردان خديجة لفتــــــــــــــــته
حطت عليه غطيان لحد ما دقتــــــــــــــــته
دخل النبى بردان وقال : فىن الغطا
البسمة غطت شفــــــــــــــــته .

أغنية إلى ذكرى صديق

الشـمـعـر شـارد فـى الجـبـل مـنـى
عـمـلـت انا هـجـان ورحـت وراه
قـلـبـى دـلـىـلى يـطـيـر و يـغـنـى
عـصـفـور جـناحـه بـدمـه مـتـحـنـى
لـفـفـنـى لـفـفـنـى الجـبـل و لا تـاه
تـسـفـى الرـيـاح سـبـعـين صـبـاح و صـبـاح
قـلـبـى دـلـىـلى و انا وراه ســـــــــــــــــواح
والشـعـر شـارد فـى الجـبـل مـنـى
حـبـيـت غـزـال غـنـيـت لـه بـالمـوـال
صـد الغـزـال سـاق الدـلال أهـوال
حـبـيـت غـزـال غـنـيـت لـه غـنـيـوه
صـد الغـزـال عـلـشـان مـا هـو حـلـيـوه

غَنَيْتْ لَهُ رَصَد
هَجَّرْ بَقَصَد
غَنَيْتْ صَبَا
جَافَى وَنَبَا
غَنَّتْ لَهُ بِيَّاتَى

رقاص أنا وشاعروناياتى
وافدى رفاق الفن بحياتى
وافديك يا نجم اخضر يا بيّاتى
أَفَدِيكَ أَنَا
يا عندليب المشنقة عشّه
عافر مع الجلاد قام هشّه
علشان يروق الجو لفعاله
يقتل ويعمل كل ما بداله
يهبش فى ورد الحب ويحشّه
صوتك من البلد البعيد جاله
عدّى من الحراس وعدّاله
وَكَلَّ أَنْ يَدَ الرَّبِّ نَازِلًا لَهُ

تكشف نقاب الغش عن وشّه
أفـــديك أنا
يا عندليب ع المشنقه عشه

خارج في يوم العيد وقلبي سعيد
شفت البنات يتعاجبوا في الألوان
كأنهم أغانيك يا بياتي
يا ابو الأغاني الزرقا والخضرا
وكان حلمك بان وآن له أوان
مديت خيالي للعراق . . لبعيد
لابنك «على» وهاديتته بألونه
كاتب عليها جميع حكاياتي
كان ياما كان
ملك الزمـــان
كان ياما كان
ظـــلم وهوان
إنسان جمعـــان
كان ياما كان

وَكأنَ حلمك بان وأن له أوان

الغنوه زرقا والكلام بجناح
فتحت انا للشمس شباكي
على قاعده الشباك أنا تاكي
بين شفتي وصوابعي ناى نواح
تسفى الريح سبعين صباح وصباح
قلبي دليلى وانا وراه سواح
والشعر شارد فى الجبل منى

فاطمة

المكن دایر بیطبع لیل نهـار
لیل نهـار دایر بیطبع المکن
من سنین. ثلاثین وخمسه
المکن ما سکتش همسه
إمتی ماتت فاطمة آل یوسف
وكم فــــــــــــــــات من زمن
قــــــــــــــــالوا من سنتین
ضــــــــــــــــحکت وقالت لأ
اللی بیــــــــــــــــموت قلبه یسکت
ولا نــــــــــــــــسمع لهش دق
بس دی لسه بینبض قلبها
قلبها بینبض بینبض لیل نهـار.

أهل الهوى

١

اللحم طين والعروق دود من ديدان الطين
آدم وحواء على أرض العدم حاطين
عاقبهم الرب . . أخرجهم من الجنة
آدم عمل حزن حواء جنته وغنى
الناس بتتهنى مهما يكونوا منحطين

٢

الولف لو شاف وليفته ورا الجبل هدمه
ياميت ندامه على جبلين واصطدموا
اتهد منهم جبل اسمه هاييل وانهار
قابيل أخوه اللى قاتله «كعب دموع» انهار
واللى افتتن بالنهار . . بالليل يا ندمه

٣

مرات عزيز مصر شابه وجوزها راجل كهل
يوسف حليوه فلسطينى عديم الأهل
فؤادها قاذر نار وصار تحت النهود لاعب
تهبش فى يوسف وتترجاء وتداعب
والعقل صاعب لكن خلق المتاعب سهل

٤

وفى التاريخ كليوباتره الأسمرانيه
كانت غرامها غرام اسكندرانيه
غرام عنيف له حفيف تعبان ولسعه نار
من عشقها لحسنها خافت عليه يحتار
واختارت الانتحار . . . المعجانيه

٥

من برق سيف الجدع . . يطلع صباح أمله
عنتر معتتر لكن مسكين أبوه همله
بسيفه قدّف فى بحر الدم عدّاه هوم

ولجل عبلة وقُبلة منها . . ساد القوم
والحُر له يوم يدوق الشهد من عمله

٦

عالم من الهمس من غير أمس من غير غد
الشمس ليلي . . القمر ليلي . . السؤال والرد
ليلى . . ومجنونها قيس هايم يقول ليلي
دى مهما كانت لغيرى وقسمتى مايله
الروح مادام طايله . . ما يهمش تنول اليد

٧

عنتر من الغرب، أسمر يندهوله عطيل
كلل على ديدمونه وشالها فى عينيه شيل
بياض عيونه لمع من ضئى حلاوتها
أولاد حرام غيروه بالغيره موّتها
والغيرة غشوتها ما تفرّق نهار من ليل

٨

كل الأحبة على حبال الهوى طالعاه

فاكرين نجوم السما شبابيك غرام والعه
أنظر لرميو الجريء طالع يشوف جوليت
تعرف بإن الغرام يكره بيبيان البيت
وإن كنت حبيت ما تهزم قلبك القلعة

٩

الريح تباريح جريح ما ينتهيله أنين
حسن قتيل من سنين ونعيمه فى المجانين
على كل ملقف هوا تستنى تستنى
يجيلها صوت كله موت ويئن له أنه
والحب له ناس جنة وناس غلبانين

١٠

كان ياما كان فيه مَلِك لكن مالوش أحباب
عشق رمى التاج وعاش العمر كله شباب
فيه ناس يقولوا عليه مجنون وناس جاحد
وأنا اقول أبيع عمرى كله بيوم غرام واحد
ده الحب والحق واحد يا أولى الألباب

ميلاد

بعِدَتْ ولادتي في الزمن ثلاثين سنة
صَبَحْتُ تاريخ زى السيوف والسقاين
زى الشراكسة والشموع والسلطنة
زى الخيول . . ضاعت سنيني في السنين

القاهرة، والألف مدنة شمعدان
آدم عريس في بولاق وحوّا في الحریم
القاهرة، والناس في كهف الليل ديدان
آدم وحوّا بيَقَرُوا توفيق الحكيم

غَنَّاها بِشَرْفٍ كَرْدُ غَنَتْ لَهُ عَجَم
رديت أنا من فوق بجواب الجواب

وخرجت كالعنقود من كرم العدم
قطرة حياه محلوقة من ضرع السحاب

آدم وحوًا شقّطوني في الهوا
زى المخدة الريش ولعبوا في السرير
صرخت ضموا الصرخة بالحضنين سوا
ونعست نمت سعيد في المهد الحرير

جدّي رفع يدي بطرطوفة البنان
ضحكن شواربه وكرمشيت إركان عينيه
مولود ذكر ينشأ على كفوف الحنان
محروس من الله والملايكة حواليه

يا هل ترى الطفل اللي نايم يبتسم
من خلف جدران في العدد ثلاثين سنه
هو الحزين . . هو البدين الملتحم
هو أنا يارب ؟
والأَمْشَشْ أنا

الليلاڊى

الليلاڊى كل أحببائى زارونى
طيف خيال كحل عيونى
هام معاهم قلبى. سافر ودعاهم
محلا طعم السهد لما سهرونى
قلبى سافر ودعاهم . . م البوادر
من على روس الجبال من كل وادى
فلى بلىلاڊى
الى منها الشمس جايه
البلاڊ العريضة

الىلىلاڊى
زارنى فارس م الجزاير

طيف على جبينه قرئت كلمة بطل
السلح فى إيديه وفى عينيه الأمل
والشباب من قلبه فاير
قبل ما يرد السلام قال ح انتصر
انت منصور والسلح راح ينتشر
وح نبني له منابر
والهناح يقول أنا جاي فى ميعادى
ليله تشببه ليلادى
فى بلادك وبلادى
الى منها الشمس جايه
البلاد العريضة
الى
زارنى من شعب العراق
طيف جميل . . علمنى إيه هو الفدا
بنت زى الورد . . والدم الندى
بنت عم الشهداء
ماشيه فى الموكب بتهتف للحقيقة
جرحها وسامها . . وفى دموعها البريئة

كلل دم الأبــــــــريــــــــاء
 زارنى طيفها وابتسم لى بضحكة مرة
 قلت بكره يكون لقانا ف أرض حرة
 بعد أهوال الفــــــــراق
 والهناح يقول أنا جاى ف ميعادى
 ليله تشببه الــــــــيــــــــلادى
 فى بــــــــلادك و بــــــــلادى
 اللى منها الشمس جايه
 البــــــــلاد العــــــــربية

الــــــــيــــــــلادى
 من فلسطين جت لى نسمة
 فيها من ريحة زهور البرتقان
 فيها طيف إنسان واحشنى من زمان
 جه وزارنى وقال لى كلمة
 زى أجراس الكنيسة والأدان
 احنا راجعين أرضنا . . آن الأوان
 والشقاع يدوب فى بسمه
 والهناح يقول أنا جاى فى ميعادى

الى جرى لجميلة

شفايفها لما تضحك
زى شفايف ثريا
وعيونها بالحواجب
تمام شبيه سنية
وشعرها المموج
مفروق من الشمال
على الموضنة البناتى
زى عروسة كمال
وسمرا زى خضره
ورق يقه زى سوسن
والورد فوق خدودها
صلاة النبى أحسن

والصـــــورة بين إيدينا
مع كل حيّ حـــــبّـــــه
ياخذها يطل فـــــيها
حرام يا عـــــيني . . شابه
واللى مـــــادريش يقـــــولك
مالها؟ جـــــرى لها إيه
ده اللي جـــــرى لجميله
ما ينسكت عليـــــه

وجمـــــيله من الجـــــزاير
بلد البـــــحر الكبـــــير
بلد ولاد عـــــمـــــامنا
فرسان الأســـــاطير
اللى زارعيـــــن رايتهم
ع القـــــمه مـــــرفـــــفه
اللى سايبيـــــن بيـــــوتهم
والفـــــرش والدفـــــا
علشان عاوزين يعيـــــشوا

حياة مشرقه
جميله واحده منهم
واحد من شعوب ثاير
بتكره المظالم
ويتحب الجـزاير
ويتحب الأغـاني
ويتحب العمـاير
ويتحب الجنـاين
والورد والعـيال
واللى جرى لجـمـيله
شئ من ورا الخـيال

تجرى والدم نازف
وتقول يا جرح جـازف
اصـبـر ده الوقت آزف
والناس مـسـتنظـره
أوامر القـيـادة
أحـبـبك يا جـزاير

أجرى كـمـان شـويه
خطوه كـمـان زيـاده
وف كـتـفـها الرصـاصـة
وعـضـام اتـحـطـمت
تنـزف تنـزف وتـجـرى
لـحـد مـا اـتـرـمت
وكـلاب الصـيـد جـابـوها
ومـهـمـا يـعـذبـوها
ومـهـمـا يـصـابـوها
ومـهـمـا يـضـرـيـوها
ومـهـمـا اتـأـلمـت
أبـدأ مـا سـأـمـت
ومـهـمـا يـغـصـبـوها
أبـدأ مـا اتـكـلـمت
يا حـسـره ع الشـبـاب
بـين أنـيـاب الكـلاب
كـتـبـوا العـذاب عـلـيـها
بـدال كـتـب الكـتـاب

والدنيا تروح وتيجي
 جُـوّه عيون البنيّه
 اللي ف صورتها بانّت
 شَبَّـة عيون سنّيّه
 وتَبَّـهت الشافيف
 الضجّـاكه الشهيه
 اللي ف صورتها بانّت
 زى شفافايف ثريا
 وشـمـرها المـمـوج
 اللي ف صورتها سـال
 من فـرقـع الشـمـال
 زى عروسـة كـمال
 مـمـجـون بدمها
 حَبَّـة عين أمها
 حَبَّـة عين النضال
 واللى جرى لـجـمـيله
 ما تحمله الجبال

وتر من الكمنجيه
وتر واحد وحيد
نوح عشان جميله
فى أول النشيد
والأوتار اللى باقيه
صرخت من غير دموع
وامتدت م الكمنجه
لحناجر الجموع
على باب المحكمة
والعلم كله واقف
على باب المحكمة
بيفنى غنوة واحدة
راعده ومدد مدمه
تزلزل السما
وقضاة المحكمة
العصبة المجرمه
بقلوب مطاسمة
وعلى عينيهم غما

وفى إيديهم دما
بيسمعوا الأغاني
وهماً فى وادى تانى
وايش تعمى المعانى
فى عقول مضلّمة

طول الليل السجانة
بيسنّوا المقاصلة
وجميلة فى الزنانه
سامعه ومستحيلة
طول الليل المعارك
دايرة فى حوض الجبل
وجميلة فى المهالك
عايشه على الأمل
أمل أمل أمل
أتقّدم يا بطل
تبّت فى البندقية
خلّى النار تشتعل
ده اللى جرى لجميله
مالوش غير العمل

على الرّياية

ما غنيتش يا خلى بقالى زمان
وجايب ربابتي . . إنما خجلان
ولابد قبل ما اقول أصلى على النبي
بذكر النبي يتطمّن اللهفان
نبي عريى ما كان شاعر ولا نظم
ولكن قلبه كان ملان بحنان
ولكن قلبه كان ملان حُب للبشر
وكان يكره العدوان والطفيان
وكان سيف وكان ورده وكان روح وكان جسد
وكان نار وكان جنة وكان إنسان
أصلى على نوره اللى بيشتع بالأمل
رسول العمل طه النبي العدنان
يقول الفتى الشاعر على قد قدرته
وجوّات صدره م الحماس غليان

بكائية

جايه عروس الشعر م البغالة
بملاية لفّ وكف متحنى
شافت صوان وحبال وناس شغالة
وأنا بابكى جنب الباب ومستنى
والشمس تقطر حزن ع الصبحية

مين اللى مات يا شبّ يا بو دموع
قالت عروس الشعر للموجوع
مين اللى مات يا شبّ، قل لى يا خويا
قالت عروس الشعر . . لا يكون ابويا
انا قلت ابونا كلنا يا حبيبّه

مات زى ما كتف الجبل ينهدّ
مات باقتدار وفخار ماقالش لحدّ
بيرم . . ومات ماشى فّ طريق الجّد
وجنازته ماشية أهّ فى شارع السّدّ
والنعش عايم فى الدموع فى عينيا

فايت فى قلب القاهرة ومعدّي
هو عارفها وهى مش عارفاه
على كل حاره وكل عطفة يهدّي
كلّ أنّه راجع لسه من منفاه
بيبوس بعينه اللبدة والجكبيّه

ده القبر ده . . والا كمان منفى
طالع عليه الشوك والحلفا
ده القبر ده . . والا كمان تبعيده
حدّفوه عليها كلمتين فى قصيدة
بيرم . . فتّحت ديوانه ردّ عليّا

أنا رجل فيلسوف...

إن قصيدتي «بكائية».. و «ميلاد» وقصائد أخرى كلها تصدر عن نفس حزينة، ونغم هامس، وبحث متلهف عن مأوى دافئ للنفس، بل وذعر من الحياة التي يعانيتها الإنسان وحيداً وسط عالم صاخب ملئ بالضجيج، لا يعبأ بمشاعر «الفرد» ولا بأحاسيسه الذاتية، أو مطالبه الروحية.. خاصة إذا كان هذا كله متصلاً بنفسية فنان أصيل الإحساس.

إنها تجربة الظمأ الروحي، تجربة الإحساس الوحيد تجربة البصيرة التي لا تقتنع بالمظاهر الخارجية للحياة، ولا يمكن أن تسلم نفسها إلى قالب جاهز مستقر يمنح السلام في إطار من البلادة، أو الهدوء الجامد الرتيب.

وهو ظمأ العصر.. ذلك الذي يعانیه صلاح جاهين وقد كان ضمن هذه القصائد لوحة كاركاتيرييه ضاحكة إسمها «أنا راجل فيلسوف» ورغم أن صلاح جاهين يستخدم موهبته العميقة في الفكاهة إلا أنه مع ذلك يعطينا صورة للإنسان «المهشم» الذي يعيش في المدينة تسحقه الظروف وتشوه شخصيته، وتحوله إلى مثال للفكاهة والسخرية، وكان يطمح إلى أن يكون مثالا للعقل الناضج والشخصية القوية والواقع أن الطابع الضاحك لهذه اللوحة يُزيدها روعة، فالمأساة تصل في شدتها أحيانا إلى حد تسخر فيه من أهدافنا وآمالنا في الحياة.. إنها مأساة مُضحكة.. ولكنه على رأى المتنبى ضحك كالبكاء الفرق الأساسى بين أحزان صلاح جاهين في هذه القصائد والحزن الذى عبر عنه الشاعر الشعبى التقليدى القديم، هو أن الشعر الشعبى القديم نشأ أصلاً فى الريف أو فى مناطق البدو، ولذلك كانت أحزانه غالباً هى أحزان الجماعة أما أحزان هذه القصائد فهى أحزان الفرد الذى يواجه تجربة الحياة وحيداً.

قصاقيص ورق

منين أجيب مقص مجنون زبي - بس نص نص
واجيب ورق وافضل أقص أقص أقص
أفضل أقصقص ورد من على كل لون
لحد ما اعمل عندي حبه كتير كتير،
واركب لي نسمة، واطير اطيير،
واحفن وادردب ع البلاد،
مطر غزير،
ينزل يرخ يرخ، على قرعة بنات أخت البشر
يتسبسبوا، ويتشيكوا،
ويبقوا لابسين - لا مؤاخده - طراطيير.
ويا سلام..
لو كان كمان معايا وقتيها قلم كوبييا، طويل
طويل، طويل،

أبله من قلبى، اللى عرقان م السفر.
واكتب به وانا طائر، على خد القمر..
انا باحبك يا جميل
قصاقيص ورق..
لكن مطر
يرخ، جامد، قد ما يحبوا الولاد،
يادوب كده،
مقدار مايجروا، ويمسكوا
مطر!.. خطر!..
ينزل على كتاف العجايز!.. يضحكوا
يشبك فى سلك التلفزيون
هنا، وهنا، وهنا، وهنا،
على كل لون،
واللى فى جنازته فى التابوت، يفوت، يبص..
يلاقى عالم، كله كله زينة عيد ميلاد،
ويبقى فصل، لكن مفيش بالشكل ده!
لابد من عيد الميلاد
انا عيد ميلادى مالوش معاد،

فين الورق، والنسمة، والمقص، والقلم ياواد..

والا بلاش، ده مفيش أمل!

أعياد كتير بيبتدوا، ويبفرغوا،

وبيفضل العالم كده،

مكبوس، ودمه ثقيل ثقيل...

يا ربنا،

يا اللى خلقت لنا الأيادي، للهزار، وللعمل..

اديني قوة ألف مليون إيد،

عشان

ازغزغه!

المرافعة

حلمت الليلادى، باني فى موقف رهيب،
بأقول، والكلام منى طالع نحيب..
سيادى القضاء،
دفاعى بسيط.
كلامى ماهواش غويط، وماهواش عبيط.
بسيط،
بساطة هدوم الغالبا الفقارى الحفاه.
بسيط، زى اسم صديق على شفة صديق.
بسيط زى دمعة برئ،
بسيط زى وحش جعان فى الفلاه،
بسيط زى حفنة دقيق.
سيادى القضاء، يا ذمم يا همم يا قمم يا عتاه،
دفاعى قوى.
قوى، زى صرخة غريق،
بينده لقارب نجاه بينده بينده بأخر قواه، للحياه
دفاعى قوى زى دقماق حديد،

قوى زى نظرة وعيد،
قوى زى تمثال،
قوى زى بلطة رجال الحريق فوق ببيان الحريق.

سيادى القضاء،
سيادى الكرام العظام الفخام العلاء،
دفاعى مؤيد،
مؤيد بكل الكلام العظيم،
بتوراه، بإنجيل، بمزامير داود،
بقرآن كريم
دفاعى مؤيد بكل أنين الكمنجات فى كل الوجود.
بكل حفيف النسيم.

بتهنينة الأمهات للعيال فى المهود،
بقولة «باحبك»، وآه،
بصوت القبل،
وكل ابتسامة بحق وحقيق،
تؤيد دفاعى.
وبارفع صباعى الضعيف وباقول كلمتى...

سيادي القضاء،

سيادي الحدادي اللي حايمة على رمّتي،

ح اقول كلمتي.

لكين قبل ما انطق واقول كلمتي..

قولولي انتوا..

إيه تهمتي...؟؟

باليه

.. وينت أم أنور، بترقص باليه
بحيرة البجع،
سلام يا جدع..
سلام على الأيدين اللي بتقول كلام،
سلام على السيقان اللي مشدودة زى الوتر،
سلام على القوام اللي مليون دلح مش حرام،
حلال، زى نور القمر..
سلام ع الخطاوى اللي بتمر على الكون تداوى،
سلام على الغناوى،
سلام على النسيم فى الشجر.
.. وينت أم أنور، بتضرب بساقها الفضا،
وبتشب، وتلب، وتنط نطة غضب،

ونطة رضا،
ويتقول بلخوة إيديها: اللي فات انقضى.
.. حقيقى، مضى.
كات املك يا بنتى،
فى أزجال معلمنا بيرم يا سلام عليه،
ماتعرفش تركب سوارس تروح الامام،
وتمشى.. تقع.

تراب دخان

لقيت في جيبي قلم.
قلم رصاص، طول عقلة الصابع،
معرفة مديت إيدي عايز إيه.. راح طالع،
أصفر، ضعيف، ضايح،
وما بين تراب دخان، وقشر سوداني، كان مدفون،
وكنت ماشي لوحدي في الشارع،
معرفة رايح فين، لكن ماشي،
والليل عليا وع البلد غاشي،
ليل، إنما ليل اسود الأخلاق.
ليل، إنما عملاق،
اسود سواد خنّاق،
اسود، كمليون عسكري، بستره خفّاشي،
وجزمه ضبّاشي،
بينظموا السهرة.
الخلق يا حسره،
الخلق مالهاش خلق للسهرة..

الخلق عاملين زى عشاق كلهم مهاجير،
 ومروحين مقاهير
 يستنظروا بكرة.
 مقهورانا وماشى
 - اصل القمر قال جاى وماجاشى -
 ع النيل ماجاش.. وماجاش كمان ع الهرم..
 لفيت عليه القلعة لفيت بولاق،
 قمرى لقيته عكم.
 لذت عليه امبابه والوراق،
 قمرى لقيته محاق.
 وعنيا وقموا م السماء الأرض،
 الأرض برضه محاق.
 قهاوى، سوده من الهباب والهند،
 والراديوهات تنعب نعيب الجنون.
 ياليله من غير قمر..
 يا كحل من غير عيون.
 ولقيت فى جيبي قلم،
 كانه واد مقروض ومتجادع،
 قزعه لكين ملمون.
 مبرى قوى ومسنون

تقولش ح يخطط نظام الكون؟
وأعمل به إيه وأنا ماشى فى الشارع،
أنا كمان قزعه وكمان ضايع
وكمان عليا تلؤل تراب دخان.

ياميت ندامه عليكو يا صنايع،
سبع صنايع، بس آه ياندم،
سبع صنايع بس آه يازمان...
ارسم لى قطه يابابا..
ارسم له قطه بتشتغل بهلوان
اكتب لى اسمى يابابا.
اكتب له اسمه بخط مرعوش حنان.
ادّينى قلمك يا بابا..
ادّيله قلمى يشخبطه ع الحيطان.
وشيلنى أويح يا بابا..
اشيله على صدرى كما الصولجان!
... كان القمر أيامها طفلى أنا،
وعليه زغّب ناعم كمثّل الطير،
واخضر كأنه لمونه م البنزهير،
وكنت اشيله، وافرّجه لكل حى،

اتفرجوا، شوفوا غلاوة الضنا
والناس يقولوا اسم الله خير والله خير،
يارب خليه لك..
الربّ خلاه.. بس مش ليا،
ضاع القمر منى وانا غفلان،
وصبحت يا إخوان،
لا بد ما يتشحتفوا عنيا
علشان أذول منه شعاع من ضى

واديني ماشى لوحدى فى الشارع..
معرفش رايع فين، لكن ماشى،
والليل عليا وع البلد غاشى،
ولقيت فى جيبى قلم..
كتبت به غنوة عذاب.

فى الربيع

الربيع جاى السنادى شكل تانى،
خَضِرته نجوم وحدويه .
عصافيره نسور صلاح الدين قويه،
ورده دم احمر ملهلب،
والأغانى
صرخات الجماهير الثوروية،
الربيع ذات نفسه ثورة،
ثورة ع الموت والخمود،
الربيع فى دمشق كان حالف يعود،
شق فى الجلمود وعاد،
زى ما ف بغداد نَبَع وسط الشتا..
يا حلاوه ع الربيع وسط الرمال..
الرمال غطت على القدس ليالى طوال طوال،
ألف ليله.
إلا ليله.. ودوام الحال محال.
نغبت فى الرمل زهرة،

رفعت راسها بحذر، تحت الرياح، متلفته
الربيع اذآلها قوة في المعافرة،
فرّعت، واتمطعت..
الرمال اتعتت،
والرياح اتزعزعت،
والصخور اتقلعت،
والوحوش اتفزعت،
والقلوب السوداوية اتخلّعت،
ركعت تحت الجزم واتضعضعت..
والريات اترفعت،
والحناجر لعلت،
والسيقان الشابه في الرقص المزلزل بدّعت،
والبنادق طرقت،
كل بلدانك يا اردن وثّعت،
كلها سمعت، وعت، قالت آمين..
يا سلام...
الربيع، حتى في قلب معسكرات اللاجئين.
مش باقول لكم، الربيع ده شكل تانى؟..

روحانية

فيك يا حديد روحانية
ان كنت مسمار، والا فاس
ان كنت مفتاح، والا بريمه،
ان كنت سيف، والا ابره،
ان كنت محرات،
ان كنت مشبك شعر،
ان كنت مروحة موتور،
ان كنت مطرقه،
انت كنت سيخ،
ان كنت جنزير خرده فى التراب،
فيك روحانيه..
عشان ما بين الارض والسما،
فيه ابن آدم.

مرحب

باكلم الناس كلهم، من هنا..
وياقول لهم، وللحياة: مرحب.
ودى كلمة ياما اصعبها، ياما اصعب،
لو تنطلق من هنا،
م الصدر، من ع الشمال،
من قلب شال أحمال مهيش هيثة..
ياقوة الله..
أحمال جبال فى جبال، ياولداه.

أحمال جبال، كوايبس على قلبى.
مولود بها؟.. والا رمانى البين؟..
أعرف منين!
جانى حكيم واتنين يا صاحبى
جانى حكيم واتنين.
حكيم يقول: ده الهم.

وحكيم يقول: يا عم،
دى خلقه ووراثه عن الوالدين.
ومنين أزيح ده كله عن قلبى..
قالوا: اللى مكتوب على الجبين، لازم تشوفه العين!

جبين وعين مين بس يا جدعان؟..
مفيش إيدين للجنان، عشان تكتب،
مفيش إيدين، غير بس للإنسان.
هو اللى وياه القلم،
يكتب به ويمللى.
ومفيش جبين مكتوب عليه طلسم، ولا قسم،
اتخط واترسم.
ومفيش قدرع الخلق متوئى..
قلبي اللى شال أحمال جبال ابتسم،
وقال: زيادة علاده يا خللى،
مكتوب على جبين الزمان كلمه،
كتبتّها إيد إنسان:
«أسوان»..

«أسوان، أيا «أسوان،
«أسوان، يا أم السد،
جيت لك وأنا أسيان،
واسايا ماله حد..
جيت لك حزين، وجريت على المطرح،
مطرح ما باجي كل عام، أفرح،
بالسد زى الورد بيفتح،
وسط العرق والجذ،
وسط الغبار، والبرق، والديناميت،
والأنفجار، والرعد، والجرانيت
نازل كتل كتل كتل، حتا حيت..
والكرافات جنب الجبل، كتاكيت،
بينقروا الفتافيت.
أعوذ بالله م الكابوس المقيت.
حسيت كإنى قمت من تحت الركام، وحييت،
وبالأسى بينزاح عن قلبى،
والكباشات بتناطح الجلاميد ويتعبى..

حسيت باني عليت

على كل احزاني،

مع كل مدماك يترفع في السد، والتاني،

وطلقت شعري، ويا صفارة العمل.. زغاريت!

مسنود على صدرك يا «أسوان، أنا..

وياكلم الناس، كلهم، من هنا..

وياقول لهم، وللحياة، مرحب!

فنية القصيدة عند صلاح جاهين

مما يتصل اتصالاً وثيقاً بفنية القصيدة عند صلاح جاهين استخدامه للألفاظ، فهو يختار ألفاظاً ذات إحياء عميق، ويلتقط اللفظ ذات التاريخ الشعبي ويستخدمها استخداماً حلواً مثيراً أو يختار اللفظة الدالة حتى لو لم تكن لفظة شعبية.

وفى قصائده أمثلة كثيرة لإستخدام الألفاظ استخداماً فنياً ناجحاً، فلفظة «معجباني» مثلاً، لفظة شعبية عريقة، وقد إستخدمها الشاعر وهو يصف القطن.

«يامعجباني يا أبيض يامعجباني

يا قطن ياللى مبيض وش الغيطاني»

فهى لفظة تدل دلالة عميقة على الإحساس الذاتى بالجمال، وهو إحساس مكمل للجمال نفسه، إنه ليس تعبيراً عن غرور الجميل بنفسه، ولكنه تعبير عن الدلال.. عندما يشعر الجميل أنه جميل.. فيتباهى ويعتز. وكلمة «معجباني» تركيب شعبى رائع يدل على هذا المعنى.

وهناك ظاهرتين فنيتين لهما أهمية فى إستخدام صلاح جاهين لألفاظه. وهما يكملان الصورة التى أقصد إلى إبرازهما فعندما يقول صلاح جاهين فى قصيدة القطن «يامعجباني يا أبيض يا معجباني

يا قطن ياللى مبيض وش الغيطاني»

يستخدم محرّكة «الكسر» فى القافية، والواقع أن هذه الحركة ميراث شعبى جميل، فالشاعر الشعبى يميل كثيراً إلى «الكسر» ولا يميل فى قوافيه على الأخص إلى «السكون».. ذلك لأن الكسر حركة متموجة توحى بالإمتداد والإتصال، وهو نوع من النغم الحلو الذى يعبر به الشاعر الشعبى عن حالته النفسية تعبيراً موسيقياً جميلاً.

أما الظاهرة الفنية الثانية فهى إستخدام الحروف المتقاربة التى تدل على حالة معينة ففى قصيدة «أهل الهوى» مثلاً.. يقول الشاعر:

«الريح تباريح جريح ماينتهيله أنين» فعبرة «الريح - تباريح - جريح» تعطينا هنا معنى من خلال الموسيقى، إنها حركة ريح حزينة، تعبر عنها تموجات موسيقية متشابهة تدل على معناها أعمق الدلالة.

إن معنى الألفاظ ليس وحده هو الذى يعطينا الدلالة، ولكنه التركيب الصوتى أيضاً، بل التركيب الصوتى أولاً هو الذى يعطينا هذه الدلالة.

وصلاح جاهين يستخدم هذه التراكيب الصوتية كثيراً، إنه يستخدم الحروف المتشابهة للدلالة على معانٍ خاصة تكون قريبة من صوت هذه الحروف.

يا بو قلب وحيد

يا بو قلب وحيد.. أنا زيك تعالى
لنا عمر جديد نهايته بعيد.. تعالى
يا غريب الروح.. إليك الروح رسالة
«تعالى»

أنت من غير وأنا من غير حنان
ياما قلبي من شقاء دق البيبان
كل باب مقفول على جنينة هنا
وابو قلب وحيد مألوش فيها مكان

فين بلاد الحب فين أرض الهوى
اللى فيها الناس بتتهنى سوا

رد من قلبي كلام قال مش بعيد
يا جريح القلب في إيديك الدوا

يا غريب.. قلبي أنا أرض المعاد
يا صباح الخير على أيماننا الجداد
مد إيدك خد بايدي وابتسم
خد بإيد عمري وخذ عهد الوداد

رقص الغوازی

یا ابن الناس الغـلابه
فرحك فی شهر بابـه
انده لایوک وجـیبـه
یحضر ساعه الکتابه
أصل اللى أبوه یسـیبـه
تطمع فیـه الـدیابـه
یا ابن الناس الغـلابه

یا ابن الناس الغنای
فرحك مآذونه جـای
ماتجیبش أبوک وناسک
ناسک یا واد قـوای
واورث وهات مـیراثک
اشتـری سکر وشـای
یا ابن الناس الغنای

المغنى المتجول

مغنواتى.. مغنواتى

عواد.. قانونجى.. رفاق.. ناياتى

الفن عندى هو حياتى

سفر يوماتى

سهر ليالاتى

أنشد آهاتى

وقهقهاتى

واقول يا دنيا

خدى وهاتى

دنا المغنى المغنواتى

أغنية ولد صغير

ح أجرى كأن فوق حصان
وح اطيـر كأنى باجنحه
جميله جدا الفيطان
والفسحه فيها مفرحه

لو كنت رسام كنت جـيت
ومعايا شنطه فيها زيت
ورسمت كل غـيط وبيت
لو كنت شاعر كنت اقـول
عن الجـداول والحقـول
قصيدة فيها ألف بيت

لو كنت ده أو كنت ده
مش ح افرح اكتر من كده
ما فيش لزوم اقول ياريت

والنسممة بتمر بحنان
والشمس حلوه مصححة
جميلة جدا الفيطان
والفسحة بقيها مفرحة

ولد وبنت

ولد وبنت

ولد وبنت

كل الجنينة

ولد وبنت

ياحبُ حاسب ده هنا

وردة ولد

ووردة بنت

كان فيه بنّيه

خرجت شويه

فى المغربية

قابلت وليد

بص لها حود

وقال أهيا
سلم عليها
فهمت إيديها
قالت عينيها
خلاص آمنت

خجلانة هيا
ومستحية
لكن هنية
قال كلمة هوه
وف قلبه جوه
ناره القوية
قال يا آمالي
قالت يا غالي
غيرت حالي
ساعة ما بنت

الوقت مساً
وهى لسه
ولا هى حاسة
آدم وحو
هى وهو
اتتين فى قصة
لكن ساعتها
شافت ساعتها
رجعت لبيتها
وأنا..
حزنت..

أنا اللي كاتب الغنوة ديا
أنا الوليد
صاحب البنية
الى عيونها
قالت آمنت..

ح نروح فين؟

ح نروح فين؟

كفاية

فرحنا يومين

كفاية

ياما اتقابلنا

وياما قلنا

يا حبيبى وياما اتهيننا

لا يوم غُلبنا

م اللى ف قلوبنا

ولا دبنا من دمع عينينا

لكن اللى سهر على طول

إحساس كان حارمنى النوم

فى اللحظة الجميلة يقول

راح يخلص ده كله ف يوم
ومفیش حكاية من غير نهاية
كفايه كفايه
ح نروح فين؟
مفیش حكاية من غير نهاية
يا هنايا ودنيايا وحبى
ويم فراقنا
عارف طريقنا
وح يجيلنا مهما ح نخبى
نتفارق يا روحى قوام
وكفاية علينا كلام
اتام سنين وايام
اهون لى من اللوم
ومفیش حكاية من غير نهاية
كفاية.

اسکندرائی

اسکندرائی اسکندرائی
عیونہ حلوة ومحیرانی
انا هویتہ لہ لقیثہ
عیونہ خضرا وهو اسمرائی

یازمرد یا فاروز
یابخت الی یفوز
فرنا بنظرۃ عین
ودتنا علی فین؟
ودتنا کرموز..

البحر هادى .. والا إيه؟

باحاول افهم من عينيه

والنن لا خضر

يحكمم ويقدر

وانا اللى ماقدرش عليه

لا سكندرانى

بحر الحب عميق

كل شوية غريق

أنا خدنى التيار

تعالالى يا بحر

لو فيك قلب رقيق

لو قلبك أخضر لون عينيك

لا اخاف عليا ولا عليك

وان كنت قاسى

ياما ح اقاوى

وانا اللي روحى بين إيديك

يا اسكندرانى..

آه يا أطبا

آه م اللي بيّا

ضيعت قلبى فى اسكندرية

راحت هناؤه الببال من حياتى

ساعة ما سلط عينيه عليّا

لما انشيك قلبى.. ومال

ما بقاش فى صدرى على الشمال

بس المحبة

مالهاش أطبا

يشفونى من جرح الجمال

لاسكندرانى..

أغنية للقطن

يا معجباني يا ابيض يا معجباني
يا قطن ياللى مبيض وش الغيطاني
يا معجباني يا ابيض يسعد صباحك
يا قطن ياللى مبيض وش فلاحك
وبعوده الأيام يا حباب فى سلام

وبلدنا عروسة لابسه التوب أبيضاني
يا معجباني يا ابيض يا معجباني

سهروا الجدعان ليالى على المراوى
مواويلهم والليالى تسقى التقاوى
كل الغناوى فيها طبيب مداوى
والزرعة لم ييجيها كانى والأمانى

فى عينين كل الناس.. يقفوا لك حراس
يا قطن لما تنور على العيـدان
يا معجبانى يا ابيض يا معجبانى

الحلوة القطن نور ما بين ايديها
والسعد قمر مصور قايل عليها
شدت حزامها ورنـت بـخلخالـيها
جنت المحصول وغنت أحلى الأغاني
قطن يا قطن يا قطن.. تعالا لى بالحضن

ولا احطك غير فى عبي من فيض حنانى
يا معجبانى يا ابيض يا معجبانى

ليلة امبارح

ليلة امبارح ماجاليش نوم واحنا لسه ف أول يوم
قبل ماترمينى فى بحورك مش كنت تعلمنى العموم
أنا كنت لوحدى وف حالى شفتك مااعرفش اللي جرى لى
راحة البال راحت من بالى قلت لها مع ألف سلامه
والحيرة قلت لها تعالى لاملامه عليا لا ملامه
عمرى كوم والحب ده كوم

غابت شمس امبارح عنى خدّها الليل خباها منى
بس انت يا قمر طمنى واوعى تخاف من أى غيامه
شباكى منور بيغنى لاملامه عليا لا ملامه
عمرى كوم والحب ده كوم
وليلة امبارح ماجاليش نوم

اتنين

اتنين ولا قـبـلـنا
ولا بـعـد منا اتنين
فـيـن زى حـبـى انا
وزى حـبـك فـيـن
اتنين ولا قـبـلـنا
ولا بـعـد منا اتنين

اتنين روحين هيمانين
قلبـين وشـقـايـق
تفـوت علينا السنين
وكـأنـها دقـايـق
لايـق علينا الـهـنا
وكـأنـه توب عـايـق
ولا فى القـصـص والغـنا
فـيـه زينا حـبـيـبـين

اتنين ولا قـــــــــبانا
ولا بـــــــــد منا اتنين
قالوا مافيش الهوى
لكن احنا قلنا: فييه
ياناس شوفونا سوا
راج تعرفوا معانيه
الحب ده ســـــــــرنا
لكن ولا نخـــــــــبييه
أهه أهه حـــــــــبنا
لا نخاف حسد ولا عين

اتنين ولا قـــــــــبانا
ولا بـــــــــد منا اتنين

باحب السلام

باحب السلام
باحبه.. كأنه وليدي
وياصحي وانام
وغصن الزتون مكنو إيدي
وقلبي مناه
ما يبقى على الأرض شر
باحب الحياه
باحب جميع البشر

باحب السلام وباحبك يا شابه
وياحلم كثير بحياتنا سوا
لكين فيه سحابه على الدنيا هابه

صلاآ آاهفن... أوأآ وأفراآ الوطن

تُعد بءاءة ثورة ٢٣ فوففو.
هف بءاءة لصالآ آاهفن.
فالبداءفان مفزامنزان تقرفباف.. وقء عافش صلاآ ففزة
المء الوطنف والقومف بأشعاره وأغانفه..
أف فآولف أغانفه إلى فارفآ نابض بالآس الوطنف
والآرارة القومفة

وهذه مآموعة من أغانفه الوطنفة

إحنا الشعب

إحنا الشعب
إحنا الشعب
اخترناك من قلب الشعب
يا فاتح باب الحرية
ياريس يا كبير القلب
يا حلاوة الشعب وهو بهتف بأسم حبيبه
مبروك ع الشعب خلاص السعد حيبقى نصيبه
واحنا اخترناك
وح نمشى وراك
إحنا الشعب
إحنا حياتك وابتساماتك وانت حياتنا
إحنا بنفرح وانت بتفرح من فرحتنا
كل مانكبر قلبك يكبر بمحبتنا
وان جيت تدق الباب
ندرن عليا القلب شيله حجاب

فرشت لك رمشى
إخطر عليه وامشى
م الشوق ما بينا ماشى
باستنى .. حتى العمر مستنى

فى الغيب أنا شايفاك
قلبي انكشف عنه الحجاب ولقاك
فى الغيب أن شُفتك
قلبي شاورلى عليك وعرفتك
انت اسمرانى جميل
لك غيّه فى المواويل
والقلب لك بيميل
من قبل ما يكون لى نصيب وياك
وانا هنا ..
واحنا اخترناك وح نمشى وراك
إحنا الشعب
ياللى بتسهر لجل ماتظهر شمس هنانا
إحنا جنودك إيدنا فى ايدك مصر أمانه
بكره وطننا ح يصبح جنبه وانت معانا

واحنّا اخترناك وح نمشى وراك
إحنّا الشعب
ياللى واعدنا بأيام عيدنا هل هلالك
بكره يابكره مشتاق نظره لسحر جمالك
بكره بطلنا بجهد عملنا يحى آمالك
واحنّا اخترناك
وح نمشى وراك
احنّا الشعب.

والله زمان يا سلاحي

والله زمان يا سـلاحي
اشتقت لك في كفاحي
انطق وقول أنا صاحي
يا حـرب والله زمان

والله زمان ع الجنود
زاحفه بترعد رعود
حالفه تروح لم تعود
إلا بنصر الزمان

هموا وضموا الصفوف
شيلوا الحياة ع الكفوف
يا ما العدو راح يشوف
منكم في نار الميـدان

يا مجد يا مجدنا
يا لى اتبنيت عندنا
بشقة انا وبكدنا
عمرك ما تبقى هوان
الشعب بيـزحف زى النور
الشعب جبال الشعب بحور
بركان غضبان بركان بيـفور
زلزال بيـشق لهم فى قـبور
لجل السلام والأمل والحياة
شيانا السلاح ورعانا الإله
نناضل نناضل
نناضل بعزم وايمان
أقسم بوحدة بلادى
ويثورتى وجهادى
ما يعود على الأرض عادى
ما يسود غير الإنسان

ح نحارب

ح نحارب
ح نحارب
كل الناس ح نحارب
مش خايفين
م الجايبين
بالملايين ح نحارب
ح نحارب
حتى النصر
تحيا مصر
تحيا مصر

أحكم يا شعب

أحكم يا شعب
أحكم يا شعب
وخذ بنفسك مكانك
الأمم صعب
والنهي صعب
إمسك بيدك ميزانك
أحكم وقول
يا بلادي كوني سعيدة
عيشي في أيام مجيده
وأحكم يا شعب

ابن الغيطان

أبو الغيطان

كان حاني عوده على العيدان

رفع قوامه

وقال كلامه

سمعنا صوته في البرلمان
 وأنا اقـــــــــول واقـــــــــول
 في مـــــــــجلس الأُمـــــــــة قلبي
 هو اللي عـــــــــارف مطالبني
 واحكم يا شـــــــــعب
 إيدين بتـــــــــزرع وتصنع
 وإيدين بتـــــــــبني وترفع
 رفعت أســـــــــامي أســـــــــامي
 يا نايب الشـــــــــعب يومك
 في كلمـــــــــتك كل قـــــــــومك
 اخطب ودافع وحمـــــــــامي
 ورئنا منك عـــــــــجب
 واحكم علي شـــــــــمس بكره
 تجـــــــــمع ولاد العـــــــــرب

علي كلمة واحدة وفكره
عينا وننا طاله عليك
وقلبنا نَفْسَه يفـرح
ورؤينا قـوة إيديك
واحكم علي الصـخر يطرح
وانا اشـوف واقـول
في مـجلس الأُمـة قلبي
هو اللي عـارف مطالبي
واحكم يا شـعب

الجنة هي بلادنا

الجنة هي بلادنا
وجنهم هي حدودنا
اللي يخطيها
راح يهلك فيها
ويدوق الموت علي إيدنا

اليوم ده بعده مفيش
غير مجد وعز وحرية
لومتنا ولادنا تعيش
ونعيش في الأجيال الجاية

ح نعيش ونشوف مصر سعيدة نعيش ونشوف دنيا جديدة
وكفاحنا يكون بكرة قصيدة توصف أيام ثورة مجيدة

يا شباب اليوم ده كفاح
اتسلح وامشى ويانا
وان كان مامعاكش سلاح
قاتل بإيدك العريانه

دافع عن شمس الحرية عن شرف الراية المصرية
وشعوب الأمة العربية انت وهى وحدة قويه

فليحيا كفاح الشعب
فليحيا كفاح المصريين
موت يا استعمار بالرعب
الشعب بيـزحف بالملايين

الشعب الثاير أهو جالك تلاقيه فى يمينك وشمالك
بيقطع لك كل حبالك وبفاسه بيهدد آمالك

زفة

محلاك يا مصرى وانت ع الدفة
والنصرة عاملة فى القنال زفة
يا ولاد بلدنا تعالوا ع الضفة
شااوروا لهم

غنوا لهم

وقولوا لهم

ريسنا قال . . مفيش محال
راح الدخيل وابن البلد كفى

حيوا الرجال السُّمر فوق السفينة
حيوا اللى جاهدوا عشان مايفرح واديننا
نظرت لنا الدنيا وشافت عملهم

مَدَحْتُ بِكُلِّ لِسَانٍ عَلَى كُلِّ مِينَا

انا قلبى فاكر لسه مين اللى جارجُه
ولولا يوم النصر ما اتلم جرجُه
شفت القنال فى ايدين رجال من بلادى
رفرف عليهم قلبى من كتر فرجُه

حبايبنا شرق وغرب جاين بلدنا
والورد والياسمين هدية ولادنا
ونسيمنا بالأحضان يقابل راياتهم
وقنالنا يحكيلهم حكاية جهادنا

١٩٥٧

يا هـلا

سـوريون : يا هـلا يا هـلا
مـصريون : مرحب مرحب
الـجميع : شريات الوحدة وينشرب
سـوريون : عربى زى
شَرْف خيى

مـصريون : تعالالى ياخويا قوام قَرَب

فـرد : نشوة قلبى ووردة ف إيدى
وانا ماشى باغنى يوم عيدى
حواليا الناس فيضان إحساس
والوحدة نشيدهم ونشيدى
فى سورِيَه ومصر اتقابلوا عَرَب
يا هـلا يا هـلا مرحب مرحب
الأمة اتقابلت بالأحضان
م اللاذقية لما لأسوان

حوالين فكره حوالين بكره حاولين ثورة حوالين إنسان

والمنصوورة قتالت لحلب

يا هلا يا هلا مرحب مرحب

قدام قدام خطوة لقدام

عاوزين نفرح ونعيش فى سلام

همى يا جماهير عاوزين تعمير

والوحدة طريق كل الأحلام

والوحدة نغمها حماس وطرب

يا هلا يا هلا مرحب مرحب

وحدتنا يا غالية أفديكى

وآخد من عمري واديكى

واحلف بالعيد زغاريد زغاريد

لاضرب على إيد من يعاديكى

واللى يسالك اسأله وارحّب

يا هلا يا هلا مرحب مرحب

أغنية إلى أسوان

اعمل لنا مفتاح يا صنايعى يا فلاح نفتح ببيان الخير
أسوان ملانه حديد انهض ومد الايد ماتمدهاش للغير

أسوان بنت بنوت
المجد خاطبها
لها معاد مثبوت
توفى حبايبها

أسوان نشوانه
وقلبها بيدق
بزنود عرقانه
بين الصخر ورقتشق

النيل ما بين أسوان وبين حلوان

سافر وغنى غنوة المصنع
آه يا سما يا مغيمة دخان
مطرك عنيد منه الحديد زرّع

ده مش حديد فى النار
ده عزمنا الجبار
عدو لاسـتـمـمـار

ده مش حديد مصهور
ده شمع بنا المنصور
بيسابق التيارات
بيطير كأنه شرار
يبيعت سـلامـم القلب
ويا الحديد والصلب

أَيَامُنَا الْحُلُوة

أَيَامُنَا الْحُلُوة جَايَه هَنَّاكَ قَدَامَ عَيْنِيَا
السَّد الْعَالِي طَالَع جَايِب مَعَاه مَصَانَع
جَايِب مَعَاه مَزَارِع
جَايِب الْاَشْتِرَاكِيَّة

أَيَامُنَا الْحُلُوة هَلَّت وَجَايَه فِي الطَّرِيق
وَالْحَلْم ظَنُونَه وَلَّت وَبَقِيَ بِحَقِّ وَحَقَّقِيْق
السَّدَاه . . بِيَعْلَى الشُّغْل فِ قَلْبِه شُّعْلَه
وَالشُّغْل لَمَّا يَحْلَى يَمْلَأ الْعِيُونَ بِرِيْق

فَجَرَّتْ فَجَرٌ بَكَرِهَ يَوْمَ مَا نَسَفَتِ الْجِبَالَ
وَجَعَلَتِ الْيَوْمَ ذِكْرَى لَتَأْمِئِمِ الْقُنَالَ
الثُّورَةُ ثُورَةٌ دَائِمَةٍ فِي كُلِّ قَلْبٍ قَائِمَةٍ
حَوَالَيْنِ السَّدِّ هَائِمَةٍ تَحْمُسُ الرِّجَالَ

عَاوِزِينَ غَيَطَانَ جَدِيدَةٍ وَنُورَ فِي كُلِّ بَيْنِ
أَحْلَامَ مَا هَيْشَ بَعِيدَةٍ وَلَا مَحْتَاجَةَ لِيَارِيتِ
يَا لِي تَرِيدَ الْمَعَالِي جَاهِدَ وَاسْهَرِ لِيَالِي
وَابْنِي لَكَ سَدٌّ عَالِي رَاحَ تَبْلُغَ مَا اشْتَهَيْتِ

راية العرب

عجبي على راية العرب في الريح
في الأرض ثابتة وفي السما تفارح
والنجمتين الخضر يبصوا لنا
وبيقولوا لنا بكل عربي فصيح
الوحدة الوحدة الوحدة
مجد العرب في الوحدة
الوحدة راية ونجمتينها صبايا
علشان عيونهم ياما راحوا ضحايا
شجعان زمان فرسان حروب الوحدة
من دمهم نبتت وصبحت راية
وكم شهيد وسط الميدان وجريح
هتف وقال بكل عربي فصيح

الوحدة الوحدة الوحدة
مجد العرب فى الوحدة

يا نجمتين يا خُضْر يا عيون بلدى
باحبككم حبيبى لبنتى وولدى
حبيبى لأبويا وأمى يا نجوم رايتى
باحبككم حبيبى لعزى ومجدى
وزى ما العربى كلامه صريح
أنا أقول بكل عربى فصيح
الوحدة الوحدة الوحدة
مجد العرب فى الوحدة

زى الربيع ما لابد يوفى بوعده
لابد يوم كل العرب يتحدوا
ونجمة خضرا بعد نجمة حاييجوا
يتقابلوا فى الراية مكان ما اتواعدوا
ويرفرفوا فى العيد على المراجيح

وهناك يقولوا بكل عربى فصيح
الوحدة الوحدة الوحدة
مجد العرب فى الوحدة
عجبنى على راية العرب
عجبنى !!

الوحدة

احنا الوحدة وأمتها
احنا زُراع كَرَمَناها
احنا كُتّاب كلمتها
احنا الأمة العربية
كلنا روح واحد مابتنفّرق شماليه من جنوبيه
وحدة أمّال ايه يا حبيبي
وحده شولكان يا بيّ*

يا مرفرف على شمالي
يا قلبي قل لي مـالي

(*) شولكان باللهجة السورية معناها الحرفى «أمال ايه»

صلاح جاھين —

يا ليل يا عيني أوف ياأبا وأوف يا خي
عرب الشمال والجنوب أجمع في حي
دقة قلوبهم غنا ونظرة عيونهم ضئ
واليـد في اليـد زى السـد في القـوة
متوحدين بالأخوة ويأما غيرهم جى

وحده واحنا صناعها
وراية واحدة بنرفعها
وقلعة بتحميها سباعها
وتحمي العزة القومية
وحده وأفراح وأغاني
يهناك يا أوطاني
جيشنا الأول والثاني
بحدود الجمهورية

كلنا روح واحدة مابتفرق شماليه من جنوبيه
وحدة أمال ايه يا حبيبي
وحده شسولكان يا بيّا

الأرض

الأرض قالت آه الفاس بيجرحنى
رديت وأنا مـحنى آه منك انتى آه

الأرض قالت حنّ
طيرتنى فتافيت
رديت وقالبى يئنّ
وانا مين يجيب لى مُفيت
منك ومن عـشـشـك
يا للى عـشـشـان رزقك
عمـرى فى يوم ما بونّ

عـينى عليكى سنين
مـحـنى عليكى أب
عـبـيت فى بطنى طين
ولغـيرى عـبـيت حـب
أنا حـالى من حـالك

عَـتَـتَـبَـكَ عَـلَى المَـالِكِ

يَا أَرْضِ يَا فَـدَادِـيـنِ

خَلِيكَ جَـمَلِ يَا جَـدَعِ خَلِيكَ يَا خَلِي
مِـتَـبَـاعِ وَمَـشْـرَى بِحَقِّ رَغِيـفِ يَا تَمَلُّ
الأَرْضِ أَبْعَدِ عَلَيْكَ وَالَا السَّمَا قَوْلِي
قَالُوا السَّمَا لِلْمَلَائِكَةِ وَاحِنَا لِيْنَا الأَرْضِ
يَارِيتُهَا تَصْبِحَ لَنَا وَالْهَمُّ دَهْ يَوْلِي

وَاسِـيَـيَـنِي وَاسِـيَـيَـنِي

يَا أَرْضِ يَا عَـرُوسَـتِي

عَـمَـرِكَ مَا تَنَسَّيَـنِي

وَلَا حَـضَـنِي وَلَا بَـوَسَـتِي

دَانَا يَوْمَ مَـا نَـوَلَ يَدِكَ

وَاخَـتَمَ عَـلَى عَـقَـدِكَ

الرَّيْحَ يَرْسُـيَـنِي

كلام فى السياسة

ما ليش كتيـر فى السياسة
لكن بافكر
وما ليش كتيـر فى الكلام
لكن باعبر
من قلب مليون حماسه
وباقول كلام فى السياسة

باحلم تملـى بالسعادة والأمان
باحلم أعيش من غير ما اخاف غدر الزمان
وان جـــــــــيت ونلت المنى
يصعب عليـا الهنا
من غير ما يتهنوا جميع الناس كمان
ما اسعدش غير ف وطن سعيد من حواليا

سَمَّوا الشعبور ده حَبّ والا اشتراكية
ما ليش كتير فى السياسة

أوقات أحس كأنى على مَفَرِّق طريق
احتار ويصبح قلبى فى الأفكار غريق
ولما اشور الجيران
واشاور الخلان

رأى الصواب يظهـر جـرىء وله بريق
وأحس رأى حبايبي بينور عينيـا
سَمَّوا الشعبور ده حب والا ديموقراطية
ما ليش كتير فى السياسة.

بينى وبين أيامى حرب ماتنت هـيش
وزى كل الناس باموت علشان أعيش
أتمننى أروح عـينـهم
جـهـدى على جـهـهم
يصبح وجودنا قوة بعد ما كان مفيش

وأنا إيش أكون وحدي لولاش بلدي عليّ
سموا الشعبورده حب والا تعاونية
ماليش كتير في السياسة

أنا قلبي مليون حمان حمان
لكل شيء حمان حمان
ماليش كتير في السياسة
لكن باحب المبدأ
وباحب صاحب المبدأ
الاشتراكية
الديمقراطية
التعاونية

قائلوا عن صلاح جاهين

● صلاح جاهين نبت من جيل يصعب تكراره، فقد كان فنانا عظيما متعدد المواهب كشاعر شعبي وكرسام كاريكاتيرى... ولعل أكثر ما سيبقى لنا منه أشعاره وقصائده الوطنية التى نؤرخ بها حياتنا الثورية منذ قيام ثورة ١٩٥٢.

«نعمان عاشور»

● لم نفقد صلاح جاهين، بل فقدنا بموته ٢٠ فنانا، الرسام والشاعر والساخر، والزجال والقصصى، والممثل، والسيناريست، وأيضاً المغنى، وكل هذا متوج بخلق لا يعرف الحقد كان صلاح جاهين كاتباً من الدرجة الأولى للأغنية وكانت أغانيه تسهل على الملحن أن يضعها فى إطار لحن جيد، كانت كلماته عطش اللحن الجميل، تدفع الموسيقى، لتقديم أحسن ما عنده.

«محمد عبد الوهاب»

● كان صلاح جاهين شمساً تشع بالفرح رغم أن باطنه كان ليلاً من الأحزان العميقة وكان يدارى أحزانه ويخفيها عن الناس ويصنع منها إبتسامة ساخرة ويظهر على الناس بوجهه الضاحك كل يوم.

«أحمد بهجت»

● كانت طاقة صلاح جاهين الفنية تدفعه إلى ممارسة كثير من الفنون، كان يرسم الكاريكاتير ويؤلف الأغاني والمسرحيات وسيناريوهات السينما، وكان موسيقياً يضع الألحان، ويقوم بالتمثيل على المسرح وأمام الكاميرا. وكان ناجحاً باهراً في كل هذه الأعمال.

«إحسان عبد القدوس»

القمح

القمح زى الذهب بينادى شرشرك
وزرعة القطن مستتية منقرتك
وجاموستك الحلوة يم المسقه وبقرتك
لازم لهم حضن والا اتين حشيش أخضر
وتجيبهم الدار وتتعشى فى مندرتك

يا عازق الأرض مين غيرك حايرويهـا
يا زارع الغلة يا منبت تقاويها
مين اللى حايضمها والا يدريها
لو كنت مانتاش هنا لا قدر الله يوم
ومين حايعلف بهايملك والا يسقيها

يا ابو العيال العيال ع الفرن نغسانين
 حاضنين لعبهم جمال باركه وعرايس طين
 والصبح يا ابو العيال حايقوموا فرحانين
 لو كنت مانتاش هنا لا قدر الله يوم
 كان مين ح يفرح قلوبهم بالمحبة مين

ليام دى ع الجسر بتفوت ناس ماهيش منا
 تقلع الزرع وتبهدل فى نسواننا
 وتخطف اللقمة من أولادنا وتهيننا
 وكل ما يفوتوا تحصل معركة حامية
 ونصبح الصبح والشهداء فايديننا

ليام دى ع الجسر بيقتوا انجليز أنجاس
 سايبين بلادهم وجاين يدبحوا فى الناس
 ما يعرفوش السلام وما يعرفوش الناس
 بيحرتوا بالسيوف وبيزرعوا فى الدم
 صدق اللى قال مجرمين لم عندهم إحساس

لو كنت عايز تعيش فى سلام وحرية
لو كنت عايز تعيش للزرع والميه
لو كنت عايز تعيش وتربى ذريه
قوم طهر البر بالخنجر والمدفع
من جنس دوده انجليزى فى أرض مصريه

ما اقدرش أنسى البشر

موجود على الأرض دم كثير وله أصحاب
ماشين على الأرض لسه مانتهوش لتراتاب
قاعدين على البُرش لسه من ورا الأبواب
لاهدين ورا القرش لسه ويبطولو بهذاب
عايشين على الشمس والطين هما والأعشاب
عاملين لترس المكيه سيور من الأعصاب
حارقين فى فرن القمينه عضمهم أخشاب
رايحين وجايين غلابا مظلومين أغراب
موجود على الأرض دمع كثير وله أسباب
فى عيون مرات الشريد اللى شبكها وغاب
وف قلبها اللى الشباب عَجَز فى قلبه وشاب
وف صحنها اللى صبح بعد الحكاية خراب
ودمع بنت الطريق صادق مهوش كداب
بيكى طريقها الطويله وقلة الأحباب

يبكى خطاها الذليله بين كلاب ودياب
يكتب على الأرض للعالم أمر حساب
والأرض تشهد على دموع طفل نام ع الباب
ودمعة الطفل م الحرمان بتملا كتاب
كلام عن العدل بين الأبرياء وعتاب
موجود على الأرض موت وجروح وشوك وخراب
جنب الزهور والطيور والمنظر الجذاب
جنب الخدود والنهود وعواطف العزّاب
موجود جنود مجرمين ناقصين قرون وأنياب
مستعبدين أرضنا ومُنجسّين لاعتاب
مقدرش أنسى دا كله واتوه أنا فى شعاب
مقدرش أنسى البشر متوزعين أسلاب
بين الحرامى دالاس وتشرشل النصاب
واوصف جمال الغروب والشمس نازفة سحاب
ملزوم أحس بألم وانزف قصايد نار
تضحك لنا من بعد أيام حاتبقى شباب

ناصية الشارع

بالأسيرين . . . والسكاكين

وبالمسدس مقتولين

على أعمدة كل الجرايد مصلوبين

شُبَّان صغار

أزهار في فجر العمر ما شافتش النهار

متكلبشين في الزنازين أو مفروزين

في الطين في قصر النيل وعايزين غطاسين

ع المشرحة إنسان نحيف

بشنب خفيف أصفر لطيف

خدوده من قيامة يومين مش مخلوقين

صوابعه من شرب السجاير محروقين

عينيه على جدار الفراغ متسمرين

وعلى الجبين رفرف سلام الميتين
ما تسألوش كان اسمه إليه
إسمه على المحضر بقى المجنى عليه
إسمه بقى الجثة فى أوراق الدوسيه
ما تسألوش عن قصته كان موته ليه
المسألة صبحت فى إيد المسئولين

على ذمة التحقيق سجين
إنسان حزين
فى قلبه إحساس الغريق
مالهش عون
فى دماغه أكثر من حريق
لابس قميص مريعات وينطلون
وف رجله صندل من زمان مالهش لون
يبص على آخر الطريق
يلاقيه ما بين رجليه تمام
ثابت عليه الاتهام
وحياته بين الناس حرام

حرام عليه يركب ترام
حرام عليه الأتوبيس
حرام عليه الأرصفة والفوانيس
والمدرسة والسينمات
مكتوب عليه يعيش مابين المحابيس
فى اللومانات
ما تسألوش ده ببقى مين
شفتوه وبتشوفوه كتير فى الجرانين
بلاش سؤال
على كل حال
المسألة صبحت فى إيد المسئولين

على ناصية الشارع أمين
واقف مع حسين واسماعيل
وبنيامين
متسرحين ومشمرين
وشوية يوصل مصطفى وعبد السلام
ويبتدى يحمى الكلام

ويغمزوا بعينهم ويمكن يشتموا
ويقولوا لفظ بذيء وهما يبيضحكوا
ما تفرحوش لما تشوفوهم من بعيد
نازلين هزار وقزقه
وما تقولوش يا ريت زمان التلمذه
يعود علينا من جديد
بيشتموا
وف كل قلب صراخ يحاول يكتمه
يبيضحكوا
وف كل صدر عويل ونار راح تهلكه
وتفرتكه
ما تفرحوش
وفكروا إزاي نحوش
اللى حايشر ب له قزازة أسبرين
واللى حايطنن أمه أربع سكاكين
من قبل ما الميت يموت
من قبل ما الأيام تفوت
والمسألة تصبح فى إيد المسئولين.

دموع ورا البرقع

أنا لوحدى مفيش حاجه
مجرد إسم متشخبط على ورقه
فى إيد واحد مدير أصله قومسيونجى
يقدمها لتركى والا لخواجه
لا يعرف عربى ولا شفقه
يروح ماضى بقلم باركر بلا فرنجى
إوح مرفود
وأصبح إسم منعلق على اللوحه
تشوفه زمايلى فى الجايه وفى الروحه
يفوت عامل فى إيده نص شقّه بفول
يقف ويقول:
يا عالم ربنا موجود
مفيش مهرب من التوفير

وعامنول مارفدوا كثير
ويدخل وحده فى المصنع
ونا أطلع
أنا لوحدى
أنا لوحدى مفيش حاجه
مجرد اسم فى الجلسة بيتتادى
ما بين ميت إسم وزيادة
وجدول جلستى مليون . . والقاضى
مهوش قاضى
ينادىلى أقول له ياسعادة البيه
مدير المصنع الدبّاح قَطَعَ عيشى
يقول لى عشان جريمة إيه
وينزل أسئلة يسألها ضبيشى
وقدامه قانون عقد العمل ودوسيه
واسمى عليه
نضارته وحبابى عنيه
ونا مجرد ثلاث كلمات على الأوراق
أسامينا أنا ووالدى

وإسم اللى اترحم جدى
مايسألنيش ويسأل نفسه باستهزاء
عن الأوراق
وعن إثبات
بمستندات

أقول له مفيش
يقول لى خلاص ما تفلقنيش
ويتمزج محامى الشركة ويهتق
خلاص القاضى أنهى المشكلة رسمى
ولا اترافع ولا دافع ولا زعمق
وفيه أسماء ينادوا عليها غير إسمى
وحيد . . مدحت . . شريف . . سامى
يخشوا الجلسة بمحامى

ونا أخرج
وروحى من الشقا بتعرج
أنا لوحدى

أنا لوحدي مافيش حاجه
مجرد اسم كاتبه ف دفتر الأحوال
جدع ظابط بوليس فرحان
بنجمه يمين ونجمه شمال
يقشّر موزه ويأشّر
على المحضر
ويبعث عسكري يجيبني مع المحضر
وأصبح اسم يتكفن بكل لسان
من السكان
بعيد عن بيتكو يام فلان
خلاص بيبيعوا عفش فلان
وحا يطير الجهاز كله
بوريه ونحاس وربطة فرش
وصاحب الملك يفضل له
تلاته جنيه وستين قرش
وتمشى مراتي بعيالها
عشان تاكل فى بيت ابوها
هناك فيه ناس يحبوها

أوصلها

وفى السكة تقول ربك يعدلها

واشوف كل الدموع بتفور ويتلمع

ورا البرقع

أقول لازم نعدلها

وتدخل هيا بعيالها

ونا أرجع

أنا لوحدى

لاجيء

حابس ضناه بين ضلوعه
يابس وحايموت بجوعه
قاعد ما يعملش حاجه
لابس هدوم مش بتوعه
لاجيء قابلاته فى غـزه
وله عيون مشمئـزه
راحت فلسطين وراحت
البيارات لما لاحت
على التلال المدافع
وريحـة الحرب فـاحت
وفى الصفوف الطويلة
جر جر عياله النحيلة
شيع جنازة الوطن
لحد لما اندفن
والقاتل الوغد ساقه

قـدامه من غير كفن
مَـيِّت وقـبـره الخـلا
والغُـسـل سـيل الفـلا
الرمل يسـخن ويبـرد
وهو هـايم مـشـرد
مع الطـابـور الـلى رايـح
إلى المـصـير المـجـرد
وفى الطـابـور أـلف أسـره
وخـمـسـمـيـت أـلف حـسـره
حـسـرة عـذارى حـزاني
ع الخـوخـه والبـرتقـانـه
اللى الشـباب لم قـطـفـها
والموت خـطـفـهم خـوانـه
يا ويل كـعـوبـك يا مـيـا
الرملـه لـسـعـتـها حـامـيـه

الرمـل سـاخـن بـيـكـوى
خـالـد بـيـصـرخ وبيـعـوى
مـجـنـون فـى أوـل حـيـاتـه
«يـحـرق سـمـاه إيش بـسـوى»
وتـسـتـمـر الجـنـنـازـه
ولـلـجـبـال اهـتـزـازـه
الحـرب سـحـقت أـمـلـهم
لـمّا صـبـح فـى خـيـالـهم
زى الرمال بيـخـوضـوها
زى الطحين اللى جـالـهم
مـن الإيـدين السـمـيـنـه
اللى رـمـتـهـم رـهـيـنـه
عـلى الرمال كـومـوهم
تحت السيول نـيـمـوهم
وكـمـمـوا مـعـين بـسـيـسو

من بعد ما كـمـمـوهم
علشان معين المناضل
بيقول يا ويلك يا قاتل
يا معين يا صوت الضحايا
إرعد بصوتك معايا
إرعب عدوى وعدوك
راح ننتصر فى النهاية
خلى اللى حابس دموعه
يبكى بفرحه رجوعه
للبيارات الحبيبه
بعد الرمال الرهيبة
اصرخ فى شعبك وقول له
ساعة خلاصك قريبه
انهض وكافح وطهر
البرترتقـان راح يزهر

موال عشان القنال

يجعل كلامى فانوس وسط الفرخ قايد
يجعل كلامى على السامعين بفوايد
يجعل كلامى ولا ناقص ولا زايد
احنا فى وقت البنا ماحناش فى وقت كلام
يجعل كلامى حجاره ومونه وحدايه

فـين الكلام اللى زى الورد والحنه
أرميه سلام وانقله مواويل تتغنى
على شباب انتقل فى حب أوطاننا
شال السلاح فى يمينه وقال يا بلدى
ندرن عليكى لاخليكى ولا الجنه

وان عشت يا مصر لامشيكي برجليا
اهدى مراكب محبه للسواحليه

المصادر

- «من أعمال صلاح جاهين»
الرباعيات
أشعار العامية المصرية «عن القمر والطين»
أزجال صحفية
الأغاني
دراسة «أ/ رجاء النقاش النقدية فى صلاح جاهين والتي نشرت مع ديوان
«عن القمر والطين»

الفهرس

5 صلاح جاهين
6 الرباعيات
	ملاح ومراحل التكوين
18 صلاح جاهين من هو ٩٠٠
30 مرحلة الشباب
42 الشعر الشعبى
53 المدينة والشاعر
55 زى الفلاحين
57 بحرى
59 بكرة أجمل من النهارده
66 شوفى قد إيه
69 أغنية إلى ذكرى صديق
73 فاطمة
74 أهل الهوى
78 ميلاد

80 الليلادى
84 الى جرى لجميلة
91 على الريابة
92 بكائية
94 أنا راجل فيلسوف...
95 قصاقص ورق
98 المرافعة
101 باليه
103 تراب دخان
107 فى الربيع
109 روحانية
110 مرحيا
114 فنية القصيدة عند صلاح جاهين
116 يا بو قلب وحيد
118 رقص الغوازى
119 المغنى المتجول
120 أغنية ولد صغير
122 ولد وبنت

125	ح نروح فين
127	اسكندرانى
130	اغنية للقطن
132	ليلة امبارح
133	اثنين
135	باحب السلام
136	صلاح جاهين.. أوجاع وأفراح الوطن
137	إحنا الشعب
140	والله زمان ياسلاحى
142	ح نحارب
143	أحكم يا شعب
146	الجنة هى بلادنا
148	زفة
150	يا هلا
152	أغنية إلى أسوان
154	أيامنا الحلوة
156	راية العرب
159	الوحدة

162	الأرض
164	كلام فى السياسة
167	قالوا عن صلاآ جاهاين
169	القمح
172	ما اقدرش انسى البشر
174	ناصية الشارع
178	دموع وراء البرقع
183	لاجيء
187	موال عشان القتال
188	المصادر
189	الفهرس